

# *IMIBUTO NETIMPHENDVULO*

 Sanibonani kusihlwa, bangani. Bengikhuluma nemelusi wetfu lotsandzekako, umnaketfu. Ngi...ngiyacabanga bekunaleminye lelindzile lengingakafinyeleli kuyo; angikabe ngisakhona nje kuchubekela embili. Hhe, ngidzatjulwe kakhulu yimibono. Niyabona na? Futsi beyiminengi, cishe lishumi nesihlanu noma emashumi lamabili kulentsambama, naloko kungidzabula ngibe ticucu. Nje ngibona lokuncanyana lapha nalaphaya. Ngiyaphuma; ngatsi, “Mnaketfu Neville, uma—uma ungachubeka, chubeka; ngifuna kuphuma ngitsi shelele bese ngiya ekhaya.” Ngatsi, “Sengitokuwa nje, ngisho nenhliyiyo yami iyabhakuta, igcuma.” Ngase ngitsi, “Ngi—ngi... sekulukhuni nje nekutsi ngichubeke ngimile.”

<sup>2</sup> Watsi, “Mnaketfu Branham, bantfu bekasolo angibuta kutsi bewungacedzela yini kuphendvula leyomibuto.” Futsi ngi—ngi—angifuni ngisho nekudzebesela lapho ngidzingeke ngente umsebenti khona. Ngiyamtfokotela uMnaketfu Neville. Futsi mhlawumbe kwemizuzu lembalwa ngitokwenta lokwendlula konkhe lengingawkwenta. Futsi ngi—ngiyati kutsi kune... Billy ungena lapho; ngatsi, “Uyitfole yonkhe na?”

<sup>3</sup> Watsi, “Babe, kunalengemashumi lamabili noma ngetulu lesolo ilindzile—ilindzile lapho.” Ngako angikakhoni kutfola... Loko bantfu labatsi ababe ngemashumini lamatsatfu namuhla, futsi cishe emashumi lamabili nesihlanu alejomibono; ngako ningacabanga kutsi ngime kuphi. Ngako ngi—ngidziniwe impela, nje ngekwengcondvo ngidzinwe impela. Kodvwa sitokhuleka, sisuke sicale ngco ngalemibuto lapho sishiye khona. Bese-ke uma ngi... Uma ngiya e-Arizona nalena engcondvweni yami, ngitokhatsateka ngaso sonkhe sikhatsi. Ngitosheshe ngibuye impela, iNkhosi itsandza, bese ngikhuluma ngendzaba lusuku lunye ngalokukhulu kushesha lokungenteka, ngekucondziswa kwemshado nedivosi. Asikhuleke.

<sup>4</sup> Nkulunkulu lotsandzekako, Wena uyayati inhlitiyo yami, futsi Uyakwati kuva kwami; Wati konkhe ngami. Futsi ngiyakhuleka, Nkulunkulu; kunebantfu labanengi... Ngivele ngibayekele nje bahambe sikhatsi lesidze, Nkhosi; banengi kakhulu babo. Kodvwa ngibonga kakhulu kutsi angikholwa kutsi bekakhona munye longena namuhla kepha ngulowo lositakele. Ngikhulwa kutsi bonkhe baphuma bajabulile futsi benelisekile. Tintfo lebengingeke ngitiphendvule cobo lwami, Wena wehla ngemibono wembula emuva etimphilwesi tabo (bahleti lapha, labanengi babo, khona manje bakulalele futsi labatiko kutsi kuliciniso), futsi wembule kubo tintfo letatisemuva emphilwensi letatibangele tintfo kutsi tenteke.

Bayati, Nkhosi. Ayikho indlela eveni kimi kwati loko ngaphandle kwelusito lwaKho.

<sup>5</sup> Futsi ngiyakhuleka, Babe loseZulwini, kutsi noma nje ngidziniwe, kodvwa ngiyajabula kuba yinceku yaKho. Futsi ngikhulekela kutsi Utobusisa labo lebebemile balindzile, labanengi babo lebebafuna kungena. Futsi ngi—ngi—ngiyetsema, Nkulunkulu, kutsi bato—batonakekelwa, Moya loyiNgeweles waKho lomkhulu utobanika nomayini labanesidzingo sayo.

<sup>6</sup> Ngisite kutsi ngicedze lemibuto, Nkulunkulu lotsandzekako, noma ngente lokwendlula konkhe lengingakwenta ngayo, kute bantfu baKho batoba nemibuto yabo seyiphendvuliwe. Ngibacele kutsi bayibhale. Bayibhalile, futsi ngitivela ngibophelelekile kutama kubaphendvula. Ngako ngikhulekela kutsi Utongipha emandla kute ngikhone kwenta umsebenti wami lengiwumiselwe kuWe nakubantfu. EGameni laJesu ngiyakhuleka. Amen.

<sup>7</sup> Manje, sitocala khona ekhatsi lapho sishiye khona manje ekuseni. Leminye yalena ngingahle ngingakhoni kuyifundza, ngenca yekutsi... Ngitse kusha livi kancane, ngoba bengikhuluma kakhulu sibili. Bangakhi lobekasekuboneni lokufihlakele namuhla lomtfokotela sibili Nkulunkulu aninika loku...? Niyabona na? Loko ngulokuhle kwendlula konkhe kwako, nguleto luhlobo lwetinkonzo. Tintfo lofuna kutati netintfo lebeyifihiwi emphilweni yembuliwe futsi yashiwo.

<sup>8</sup> Futsi—futsi khumbulani, letinengi taletintfo leti... Manje, labanengi benu bayati impela kunetintfo letilihlazo leyashiwo futsi yakhishwa, kodvwa akukho muntfu lokwatiko loko ngaphandle kwami naNkulunkulu. Futsi lenitjelwe kona, loko kufanele kubesemkhatsini wenu naNkulunkulu; kuyekele ni kanjalo nje. Futsi... Bangakhi kini labatiko kutsi iNkhosi yembule tintfo leyo lebeyi... leyo leyentiwe, kuninika lusito? Phakamisani tandla tenu uma kuninikile. Niyabona na? Ngingati ngisho bantfu, lutfo ngabo, kodvwa I—Ikwentile.

<sup>9</sup> Manje, asifinyelele emibutweni ngalokukhulu nje kushesha lokungenteka manje bese sibona kutsi singayitfolo yini i... Kukhona lomunye futsi lolapha ndzawanatsite. Utsi, “Lowesitsatfu.” Ngikholwa kutsi yincwadzi; kunjalo, yincwadzi nje. Ngiyacolisa. Ngitotibeka ngalapha lapho ngita kuto, futsi ngicabanga kutsi... Yebo, mnumzane, lena yincwadzi nayo. Futsi itsi, “Umbuto,” kodvwa ngikholwa kutsi yincwadzi, umbuto losencwadzini. Cha, akusyo, ngumbuto ngeliphupho. Kulungile, ngitolifundza liphupho, bese-ke sengiyabona uma iNkhosi inginika inchazelo yalo, bese ngiyendlulisela kuwe ngangoba ngingakhona nje. Ngiyacabanga unalo likheli lakho. Ake sibone kutsi ngilo yini; uma kungesilo, ngitocela usho likheli lakho, umuntfu lonalombuto ne—neliphupho. Cha, awunalo.

<sup>10</sup> Noma ngabe ngubani lobhale lencwadzi (nje ine... ibhalelw mine nje), niketa Billy likheli lakho, kute kutsi uma sengisendleleni yami ngiphuma ngiya e-Arizona, ngitongena elugwadvule bese ngiyakhuleka. Futsi uma Inginika inchazelo, ngitokwati kutsi ngifanele ngiyibhale iye kubani (uyabona na? Ngaphandle kwaloko kulapho kuniketa inchaz-...) uma Iyiniketa. Kodvwa angeke ngiyisho ngaphandle uma ibakhona, ngoba ngingakwenta kuphela; khona-ke ngiyati kutsi itoba ngulecinisile. Manje.

- 376. Ngabe uMlobokati uto, labo labakholwa loMlayeto, uphuma aye enshonalanga, ekugcineni abutsane lapho, ngicondze kusho njalo?**
- 377. Futsi ngabe i** (Manje, umzuzu nje, lena yi...letsa... Umzuzwana nje. O! Cha, akusiko, kuna “M-f-u-n-d.” Bengicabanga...Sahluko seSambulo, futsi kubukeka njenge “Mfund. Capps,” futsi bengi—ngi—ngitsite nje kancane—kudideka kancane ngako. Kuyi...Uma ningakubona, impela kubukeka njengako. Niyabona na? Bekungu “Mfund. Capps” kwase-ke kuchubekela embili lapha...Cha, kulungile.) **Sambulo sahluko sema 12, kukhuluma ngeMlobokati?**

<sup>11</sup> Cha! “Manje, ngabe uMlobokati ekugcineni uphuma aye enshonalanga, ekugcineni na?” Cha ngekwati kwami ngako; uMlobokati usemhlabeni wonkhe, umhlabla jikelele. Manje, wonkhe umunfu lokucondzako loko akatsi, “Amen!” [Libandla liyaphendvula, “Amen!”—Umhl.]

Akunandzaba kutsi kuphi, ufelaphi, noma ngabe kuyini, uma ufela kuKhristu, Nkulunkulu uyokuletsa naYe. Akunandzaba noma ushiswe waphela, udliwe uphele, ubhujiswe, nomangabe kukanjani, Nkulunkulu uyokuletsa naKhristu uma Efika. Anidzingi kutsi nibutsane enshonalanga nomakuphi. Lapho iNkhosi ikuholela khona . . .

<sup>12</sup> Noko, uma kutsi yani enshonalanga, angikucacise nje impela loko manje, ngaphambi kwekutsi ngihambe. Manje, ngako... (Ngabe bayawutheyipha yini lomlayeto? Bayawutheyipha? Kulungile.) Ningangivumeli nginitjеле kutsi yanini kuphi. Futsi uma kutsi phumela enshonalanga, phumela enshonalanga. Uma kutsi yani emphumalanga, enyakatfo, enshonalanga, eningizimu, yani lapho iNkhosi ikuholela khona. Wonkhe umunfu lokucondzako loko akatsi, “Amen!” [Libandla liyaphendvula, “Amen!”—Umhl.]

<sup>13</sup> Angitami kutjela muntfu kutsi akangayi kuphi. Uma uphumela eTucson, e-Arizona, lapho ngihlala khona kwesikhashana kulesikhatsi...Njengoba nginitjelile manje ekuseni, ngikhumbule ekhaya ngingenalo likhaya lengingaya kulo. Bengifisa kungatsi bengingaba nalomunye, lenye indzawo lebengingayibita ngelikhaya kutsi ngiye kulo. Uma, kusihlwa,

kube beninemadola latinkhulgwane letilishumi futsi ngingikele indzawo ye...futsi ngiyinikele ngesihle ngalenyen indzawo lebengingatsi, “Ngulendzawo lengifuna kuyibita ngelikhaya,” Bengingayinikela ngesihle. Anginandzawo.

Mnaketfu Fleeman, nje ngi...sewungati kusukela ngisengumfana; ngi—ngi—ngiluzulane. Ungalokotsi ugucuke luzulane; tfola indzawo letsite loyitsandzako bese utinta; ulindze iNkhosi Jesu.

<sup>14</sup> Kodvwa uma ufunu kuphumela enshonalanga eTucson, e-Arizona, lapho ngihihala khona, wemukelekile; ngingajabula kuba nawe. Ungumnaketfu, dzadze. Ngiyokwenta noma yini emhlabeni kutsi ngisite. Futsi—futsi nonkhe lophumele lapho, ngitame ngawo onkhe emandla ami kunenta nemukeleke, futsi nginikhombise yonkhe intfo lebengiyati, futsi nginihambahambise, ngente konkhe lengingakwenta. Futsi nemukelekile njalo.

<sup>15</sup> Kodvwa uma uphuma phansi kwaletimo leti, ucabanga kutsi uMlobokati noma lokutsite utokwenyuka esukela eTucson, e-Arizona, futsi lapho kuphela, uyaphosisa. Ungaphumeli loko, ungeteli loko, ngoba loko liphutsa. Loko akukalungi.

<sup>16</sup> Manje, Sambulo sahluko seli 12...Kodvwa intfo yinye nje iNkhosi leyembula kimi noma layikhuluma kimi njenge... Ngisanda kuphuma kuyo nje leyomibono (niyabona na?), futsi kutsi kubaluhuni kukukhweshisa. Niyabona na? Kodvwa Ibonakala ikhuluma kimi futsi kutsi ngisho futsi lokunengi ngaloku kuphumela enshonalanga.

<sup>17</sup> Manje, njengoba ngishito ngaphambili, angikho ngephandle lapho kutsi nje ngibe ngephandle lapho, ngingeophandle lapho ngoba ngiholeleke kutsi ngibe ngephandle lapho. Kodvwa kuhlala ngephandle lapho, kukwenta kube likhaya lami, ngicabanga kutsi loko akukalungi. Cha, ngicabanga kutsi nje angeke kube sikhatsi lesifishanyana kuze kutsi inhloso yaNkulunkulu lengitfumele lapho itozuzwa. Ngeke nganitjela lapha kutsi kungani ngihamba, kodvwa ngeke ngahamba nje kutsi ngihambe.

<sup>18</sup> Kwabutwa embutweni ngalololunye lusuku: “Siyati kutsi kungani kucala waya e-Arizona, kwakunguleto tiNgelosi letabonakala. Kungani wabuya kwesibili na?” Niyawukhumbula lowombuto ufundvwa na?

<sup>19</sup> Bangakhi lokhumbulako ngesikhatsi ngibuya emvakwaloko futsi ngangikhleti lapho ngaphambi kwaDkt. Lee Vayle (ngikhholwa kutsi ukhona kulesakhiwo ndzawanatsite) nemkami na? Futsi ngangikhuluma nge-Arizona nangatsi sihlala lapha, futsi nako kuvela sandla elubondzeni nekuhanya futsi sabhala ngemagama, “Buyelani e-Arizona.” Bangakhi lokukhumbulako loko na? Kungako ngibuyelete lapho. Ngingati kutsi ngibuyeeleni, futsi ngesikhatsi ngifika lapho, khona-ke Wembula kutsi

ngibuyeeleni emuva. Futsi uma ngikusho, khona-ke Sathane utokuvimba. Kodvwa akayati inhlitiyo yami. Akasilo Livi, ngako akayati inhlitiyo yami. Kodvwa uma ngikukhuluma, khona-ke uyakuva. Ngako manje, kukhumbuleni loko.

<sup>20</sup> Manje, ngesikhatsi ngisho ngalolunye lusuku, ngatsi kukwenta...kutsi mhlawumbe ungahle ucabange lokungesiko; ngatsi, "Ungeti e-Arizona." Niyabona na? Ngangingakakucondzi, "Ungeti!" Lengangikucondzile kwakukutsi: Uma uholeleke kutsi ute, chubeka futsi ukwente, uma uholekela eCalifornia, e-Arizona, noma ngabe ukuphi. Kodvwa uma uya lapho, utsi, "Mnaketfu Branham, ngiya lapho, ngoba ngikholwa kutsi uthlhala lapho bese ushumayela Livi," ngikholwa kutsi uneliphutsa lapho. Uyabona na? Lapho kushumayela kwami kukhona, kukhona lapha kulelitabernakeli; nayi lendzawo.

<sup>21</sup> Anginayo inkonzo ngisho yinye e-Arizona. Futsi angibikhona e-Arizona ngaphandle nje kwema-awa lambalwa ngesikhatsi. Anginayo...Nginemhlangano weMadvodza labosomaBhizinisi emvakwaKhisimusi, umnyaka wekucala, ePhoenix. Nguloko kuphela lenginako; ngakwetsembisa loko, akukho lokunye.

<sup>22</sup> Umhlangano wami lolandzelako, ngekwati kwami, ukhona lapha eSitaladini i 8th naPenn eTabernakeli laBranham. Nginetifundvo letingemashumi lamatsatfu noma emashumi lamane lengatiko kutsi tingatsatsa liviki noma lamabili ngesikhatsi kuticedza, lenginato enhlitiywani yami kushumayela lapha eTabernakeli laBranham, khona lapha eJeffersonville, e-Indiana.

<sup>23</sup> Futsi manje, uma ufunu impela kuya ndzawanatsite kuyohlala neLivi, lapho uMlayeto wetfu...NeMlayeto wetfu awukehluki, nguMlayeto lofanako lenibe nawo yonkhe imphilo yenu, kuphela lenyi'ntfo letsite leyembuliwe kuWo. LoMlayeto nguMlayeto lofanako nalowashunyayelwa nguLuther, uMlayeto lofanako lowashunyayelwa nguWesley, uMlayeto lofanako lowashunyayelwa ngemaPhentekhostali, kuphela kwengetwe intfo letsite kuWo. Lokungiko, kwembulwa kwetiMphawu, loko labobaguculi labasuka kuko (niyabona na?), letatisiwe ngalolusuku letatingenakwatiwa ngalesosikhatsi. Umlayeto wemaPhentekhostali wawungenakwatiwa ngetinsuku taLuther noma Wesley; wawufanele kulindza kuze kube ngumnyaka wemaPhentekhostali. Kodvwa umnyaka wePhentekhostali awusilutfo kuphela nje kuchubekela embili kwemnyaka wemaLuthela. Njengemmbila nje uvutfwa noma yini lenye, lentenjalo ke nelibandla.

<sup>24</sup> Kube bengishumayelile kusihlwa, bengitoshumayela ngesifundvo, kumakiwe lapha eBhayibhelini, "UmVini lowawukadze wendluliswe usuka eGibhithe wayongena

*ePhalestina.*" Bangakhi kini labake bati kutsi Nkulunkulu bekashito kutsi Israyeli bekangumvini waKhe na? Khona-ke ngitsatsisela emuva kusukela kuloko kuya kuJesu anguMvini. NeliBandla manje lendluliselwe eveni, alikahlali phansi elutfulini, kodvwa lihleti phansi kuKhristu, lelifanele litsele sitselo. Niyabona na? Naloko bekufanele kube ngumlayeto wami walobusuku lobu kube bengitoshumayela. Kodvwa ngicabange kutsi kuncono ngitfole lemibuto lena, ngako ngivele nje ngakushiya loko. Ngitokutfolo loko mhlawumbe uma sengibuya.

<sup>25</sup> Sambulo sahluko 12 asikacondzani neMlobokati. Sambulo sahluko 12 (angikakakubuki kodvwa ngiyakwati), nguvesifazane eme elangeni nenyeti ngaphansi kwetinyawo takhe. Inyeti yayimelele umtsetfo; wesifazane bekamele Israyeli, libandla; netinkhanyeti letilishumi nakubili ebuntini lakhe kwakubaphostoli labalishumi nakubili, iminyaka yelibandla lelishumi nakubili, nakanjalonjalo, losekwendlulile nje. Niyabona na? Nelilanga lalisenhloko yakhe. Lokubonako, inyeti isitfunti selilanga, lokukutsi umtsetfo wawusitfunti setintfo letinhle letitako. Nalowo wesifazane ngu-Israyeli, hhayi uMlobokati.

Manje anginawucitsa sikhatsi lesinengi kakhulu, ngoba ngitofanele ngiyicedze.

**378. BaseRoma 7:14-18, "Siyati kutsi umtsetfo uwakamoya: kepha mine ngiwenyama, lotsengisiwe ngaphansi kwesono. Ngoba loko lengifuna kukwenta—hhayi: ngoba loko lengikufunako, loko angikukhonni; kodvwa lengikutondzako, ngulengikwentako. Kepha uma ngenta loko lengingakufuni, ngi (n-g-a-k-we-n-t-...) e—emtsetfweni, ngiyawuvumela umtsetfo, kutsi muhle. Kodvwa ke, akusesimi lengikwentako, kodvwa sono lesihlala kimi." Loku angikucondzi.**

<sup>26</sup> Yebo-ke, babbale umBhalo; lowo nguPawula akhuluma kubaseRoma. Manje watsi... Ake ngitsi nje kukupolisha kute nikubone. Watsi, "Kimi kunebantu labibili: kunjalo, munye ufuna ngikwente; lokungakafaneli, lolomunye ufuna ngente. Futsi ngasosonkhe sikhatsi uma ngicala kwenta lokulungile, khona-ke ngivinjelwa ngulokungakalungi."

<sup>27</sup> Bangakhi kini bantfu etingcogciswaneni kulentsambama lohambe kuleyontfo lefanako, futsi manje ekuseni (niyabona na?), intfo lefanako na? Ngikhulume ngako manje ekuseni, kwasikhashana.

<sup>28</sup> Wena ungumuntfu wangephandle lolawulwa yimizwa lesitfupha; wena ungumuntfu wangekhatsi lolawulwa ngumuzwa munye lokukholwa. Nalokukholwa loku kuyaphikisana nayo yonkhe imizwa lesitfupha uma imizwa lesitfupha ingavumelani nekukholwa. Kodvwa munye uphambene nalomunye. Manje, kuphela nje uma imizwa

lesitfupha ivumelana nekukholwa, kuyamangalisa; kodvwa uma imizwa lesitfupha iphikisana nekukholwa, khona-ke yishiye kanjalo imizwa lesitfupha.

<sup>29</sup> Manje, sibonelo nje lapha, Jesu wenta sitatimende, setsembiso. Umuntfu longekhatsi utsi lelo liciniso; umuntfu longephandle uzindla kutsi ngeke kwaba liciniso kuwe, bese ungammaki umuntfu longephandle bese wemukela umuntfu longekhatsi. Manje, leyo yintfo lefanako Pawula lakhulumaga. Watsengiswa ngaphansi kwemtsetfo esonweni senyama. Tsine sonkhe siyafana. Kungalesosizatfu si...sinetinkhatsato lesitentako, tekushada kane noma kasihlanu, naloku, naloko, ne...tonkhe tinhlobo tesono, nekuphinga lokunengi, nako konkhe lokunye lokuhambisanako etimphilweni tetfu, kungenca yaletotintfo. Sibenyma tsine, naleyoncenyne ifanele ibhubhe; kodvwa-ke, ngekhatsi, singumuntfu longumoya, umphefumulo ngekhatsi, naloko kukholwa eVini laNkulunkulu; khona-ke siletsa umtimba wetfu longaphandle ngaphansi kwekfutobela Livi ngekukholwa, ngekwemukela loko lokushiwo nguNkulunkulu.

<sup>30</sup> Ngingamtsatsa kanjani mangulube bese ngenta luhlavi lwakolo ngawo na? Akunakwenteka kimi kutsi ngikwente. Indlela kuphela lokungaba ngayo kungoba ngekhatsi kulowomangulube wendlulisiwe ekubeni ngumangulube kolo...mangulube waya ekubeni sakhi-mphilo lesibitwa ngekutsi “kuphila kwakolo.” Khona-ke ungewaba lowomangulube, futsi uyoveta luhlavi lwakolo (kunjalo. Niyabona na?), ngoba bekukhona kuphila kwakolo kufakwe kumangulube. Nekuphila kwamangulube kukhishiwe; kodvwa imvelo yamangulube isasolo inamatsela (niyabona na?), futsi kuyoba njalo kute kutsi lokuphila lokusha kukhule ngalokugcwele emhlabatsini bese kuyavuswa futsi. Uma sekuelva, khona-ke akusesuye mangulube, kodvwa kolo—kodvwa kolo. Kodvwa ngesikhatsi uselapha emhlabeni ne... e...uphuma emhlabeni... Namangulube, usasolo anamatsela, kodvwa usemvelweni ngekhatsi kwalowokolo.

<sup>31</sup> Futsi kuphela nje uma usasolo ukulokuphila, utoba ngulonamatselako futsi ube nemvelo yenysama letokuhlupha kuphela nje uma uphila; kodvwa lingekhatsi lakho, utelwe kabusha. Futsi uma sewuvuswa, usekufaneni naKhristu naso sonkhe sono sesisukile kuwe. Uyabona na? Nguleyo—nguleyo intfo.

<sup>32</sup> Asengisho loku? Kuvakala njengelihlaya. LiNdiya... Abantfu labatsandza kndlala mbamba. Futsi ngi...akatsandzi kndlala; ayincaba kitsi; kodvwa abonakala akahle kuwo lucobo. Futsi uma utfola kuwati, onkhe akahle. LiNdiya lake labutwa ngalesinye sikhatsi ngesikhatsi lisindziswa....

<sup>33</sup> Ngiyalikhumbula lelinye ePhoenix, e-Arizona. Billy bekehla kuyoniketa emakhadi ekukhulekelwa. Futsi bekema nje lapho futsi aniketa emakhadi ekukhulekelwa. Nalababantu lokwati kugijimela enhla lapho futsi abambe emakhadi ekukhulekelwa... Ngesikhatsi ba—bantfu labakahle impela bebanekubulawa yinhloko, kubulawa litinyo, noma lokutsite lokungakalungi elutwaneni lwabo, bane—banemakhadi ekukhulekelwa, Mnaketfu Ruddell. Futsi ngesikhatsi—ngesikhatsi benta, khona-ke elayinini lalabakhulekelwako, intfo kuphela lenginayo, umuntfu lotsite lobulawa yinhloko, lomunye umuntfu bekanentfo letsite lengalungi ngelutwane, nentfo lenjengaleyo. Futsi kwakukhona bantfu bahleti lapho babulawa ngumdlavuza netintfo letingalitfolanga lilayini lalabakhulekelwako. Ngatsi, “Billy, yehlela lapho bese ubuta labobantu kutsi yini lengalungi ngabo. Futsi uma bangenawo umdlavuza, noma lesinye sifo lesibi kabi, noma intfo letsite letobabulala, ungabaniki emakhadi ekukhulekelwa. Yenyusela labobantu etulu lapho kulelolayini lalabakhulekelwako leliya... losalungele kufa uma angasitwa yiNkhosi. Akutsi lababanye balindze nje. Abete elayinini lelisheshako noma lokutsite. Kodvwa yekela labobantu losalungele kufa...” Ngatsi, “Babute.”

Watsi, “Yebo-ke, utsite, ‘Nje shova lamakhadi bese ubanika wona.’ Nguloko lebengikwenta.”

Ngatsi, “Kodvwa utfola labobantu bagijimele lapho ngaphambi kwabo, futsi batfola... Labo labakhubatekile tatane netintfo atikwati kubatfola.”

“Kulungile, ngitokwenta.”

Uyehla; kwakukhona liNdiya lelidzala (futsi ayincaba impela), lalingahlali phansi esitulweni. Balinika sihlalo, kodvwa lahlala phansi esiyilweni ethendeni. Lalifake sigcoko; lalingasikhumi; lalinelusiba luhlonywe ngemuva kuso, lihleti lapho nje.

Billy wenyükela kuye, futsi wendlula lapho, wase utsi, “Ufuna likhadi lekukhulekelwa na?”

“Hmm.”

Watsi, “Yini lengalungi kuwe, Sikhulu.”

Latsi, “Mine ngiyagula!”

Watsi, “Kodvwa uphetfwe yini na?”

Latsi, “Mine ngiyagula!”

Watsi, “Kodvwa ngifuna kwati kutsi uphetfwe yini!”

Latsi, “Mine ngiyagula!”

<sup>34</sup> Nguloko kuphela lebekangakutfola kulo, watsi, “Kulungile, ngitobuya emvakwesikhashana.” Ngako Billy bekahambahamba abuta bantfu. LeliNdiya lelidzala lalisolo liwabukisia

lamakhadi ekukhulekelwa aya ngekuncipha ngekuncipha. Njalo uma awakhipha ekhukhwini lakhe bekatse kuncipha kancanyana. Ngako emvakwesikhashana, leliNdiya lelidzala lasukuma, lase liya ngale, lase lichweba Billy emhlane kumkhumbuta kutsi lalikuloku nalo. Watsi—watsi, “Sikhulu, uphetfwe yini na?”

Latsi, “Mine ngiyagula!”

Watsi, “Yebo-ke, Sikhulu, ufanele ungitjele. Babe utsite lamakhadi ngingawaniki bantfu labanga...nje lebebane, njengekubulawa sisu, nekubulawa yinhloko, netintfo. ‘Niketa bantfu lobekagula impela.’” Watsi, “Ugula kanjani, Sikhulu?”

Watsi, “Mine ngiyagula.” Walihlalisa phansi futsi ngaphambi kwekutsi a...emakhadi akhe lase litsi aliphele impela. Imizuzu lembadlwana...Lalisolo liwabukisisa lawomakhadi. Liyabuya lase liyamchweba futsi. Laphakamisa sandla salo. Billy wabeka likhadi esandleni salo, watsi, “Sikhulu, hamba ubhale lapho, ‘Mine ngiyagula.’”

<sup>35</sup> Wangena elayinini lalabakhulekelwako, futsi ngangimkhulekela, ngase ngitsi, “Uyakholwa, Sikhulu?”

Latsi, “Kunjalo.”

Ngase ngitsi, “Yebo-ke, uyakholwa kutsi Nkulunkulu utokuphilisa?”

Latsi, “Kunjalo.”

Ngatsi “Utoba ngumfana lomuhle?”

Latsi, “Kunjalo.”

Ngahlangana nalo evikini kamuva. UMnaketfu Fred Sothmann ngikholwa kutsi bekakhona. Kwakungesikhatsi ba...futsi ngesikhatsi umhlangano welithende uchubeka. KwakuyiPhoenix. Futsi ngahlangana nalo kamuvanyana evikini; ngatsi, “Uphila kahle, Sikhulu?”

Latsi, “Kunjalo.” Ngitfolo kutsi, ngakhulumna na... Kwakungubani ligama lalesositfunywa senkholo enhla lapho, lelokhehla nemadzevu lamhlophe, enhla lapho kuma-Apache? Angisalikhumbuli ligama laso. O, singumfo lomdzala lokahle. Umkaso waphiliswa kumdlavuza, niyati. Satsi, “Mnaketfu Branham, nguloko kuphela lelingakusho.” Satsi, “Ngalifundzisa kutsi litsi, ‘Mine ngiyagula.’ Nguleyontfo kuphela lebelingayisho, ‘Kunjalo.’” Ngako loko ku-loko kungako, niyabona. “Kunjalo. Mine ngiyagula!”

<sup>36</sup> Lomunye wangitjela kutsi bekanalo, linye, ngalesinyye sikhatsi, laphendvuka, lemukela Moya loyiNgcwele, futsi watsi kulo, “Uchuba kanjani na?”

Lase litsi, “Kuhlanyana futsi kubanyana.”

Watsi, “Yebo-ke, usho kanjani kutsi kubanyana futsi kuhlanyana?”

Latsi, "Yebo-ke, seloku mine ngemukela Moya loNgcwele," latsi, "bekunetinja letimbili kimi, nalenye yato yinja lemnyama nalenye yinja lemhlophe." Lase litsi, "Tiphikisana ngaso sonkhe sikhatsi." Latsi, "Tiyabhavumula futsi tilwe todvwa." Lase litsi, "Inja lemhlophe ifuna ngente lokuhle; injá lemnyama ifuna ngente lokubi."

Wase utsi, "Yebo-ke, Sikhulu, nguyiphi yona lencoba imphi?"

<sup>37</sup> Latsi, "Loko kuya ngekutsi nguyiphi leSikhulu lesiyondla kakhulu." Ngako ngicabanga kutsi leyo yimphendvulo lenhle lapha. Niyabona na? Lapho kuya ngekulwa kwemtimba lokuwe; kuya ngekutsi ngumuphi lowondlako, nguyiphi imvelo loyondlako, imvelo yenyama etintfweni telive, noma imvelo yakamoya etintfweni taNkulunkulu. Loko kuyakwenta.

**379. Ngabe yonkhe indvodzana yaNkulunkulu ingagcotjwa kakhulu ite yente imimangaliso, tibonakaliso, timanga, noma ngabe loku nje...ngabe kusemekondvweni yaMoya loNgcwele na?**

<sup>38</sup> Yebo, kusemikhondvweni yaMoya loNgcwele. Uma uyindvodzana yaNkulunkulu, noma indvodzakati yaNkulunkulu, nomangabe uyini, uma wemukele Moya loyiNgcwele, khona-ke Moya loyiNgcwele ukucondzisa kutsi wente tintfo.

<sup>39</sup> Anginaso sikhatsi. Ngifisa nje kwangatsi benginganicocela tindzatjana. Ngaso sonkhe sikhatsi uma ngicabanga ngako, nje ngivele ngikwendlule. Kodvwa ngicabanga kutsi loku kutobambelela umzuzu nje.

<sup>40</sup> Kwakusentasi eMeridian, eMississippi. Labanengi benu bantfu bakamunye, uMnaketfu Bigby bekabambe... wase usita imihlangano yami ngetimali, ungumnaketfu longuwakaMunye. Futsi ngalobunye busuku emhlanganweni, Billy Paul bekawelele enkhundleni lenkhulu futsi bekakhipe emakhadi ekukhulekelwa. O, laliyidliva imvula. Nebantu bekeme ngephandle netambulelo netintfo. NaBilly uniketa emakhadi ekukhulekelwa, futsi kwakukhona i... Wase-ke atongilandza. Futsi ngesikhatsi isesekhona...ngesikhatsi iseta itongilandza, kwakunadzadze lomncane lobekahleti phansi ngembili, futsi kwakukhona lomunye dzadze ahamba neluswane loluncane, atama kuluthulisa. Nalodzadze lomncane ahleti lapho agcoke ingubo lencane yakhalikho, noma ngabe kwakuyini, bekangumake naye. Futsi bekabone lodzadze, naMoya loyiNgcwele wakhulumka kulowesifazane, intfo letsite enhlitiyweni yakhe, "Hamba ukhulekele loloswane."

<sup>41</sup> "Yebo-ke," watsi, "ngalokulandzelako uma endlula, ngitohamba ngiyolukhulekela." Futsi ngesikhatsi endlula futsi, lodzadze bekabambe likhadi lekukhulekelwa. "O," watsi, "A—angikakhoni kuhulekela loloswane." Watsi, "UMnaketfu

Branham utolukhulekela loloswane kusihlwa. Futsi mine ngingubani kutsi ngikhulekele loluswane uma uMnaketfu Branham atolukhulekela na?" Manje, loko kwakukuhlonipha ngekutitfoba, naloko kwakukuhle, kodvwa loko ngeke kuhlale kuyintsandvo yaNkulunkulu. Ngaletinye tikhatsi kwehlukile.

Moya loyiNgcwele wachubeka nekumtjela, "Hamba ukhulekele loloswane."

Ekugcineni wacabanga, "Lowo wesifazane ngeke angivumele nhlobo. Ati kutsi unalelokadi lekukhulekelwa, akanawufuna kutsi ngikhulekele loloswane. Uletse loloswane lapha, hhayi kutsi lukhulekelwe ngimi, kodvwa kutsi uMnaketfu Branham alukhulekele."

Ngako Moya loyiNgcwele wachubeka atsi, "Hamba ukhulekele loloswane."

Ekugcineni watsi, "Yebo-ke, kutsi ngitikhulule ngitovele nje ngisho... Ngitomnika situlo sami." Ngako watsi, "S'thandwa (munye make lomncane akhuluma nalomunye), unga—ufuna...? Unaloloswane," Watsi, "ungeta, uhlale phansi lapha, utsatse situlo sami?"

Watsi, "O, S'thandwa, angifuni kutsatsa situlo sakho." Watsi, "Ngitama kuthulisa loluswane."

Watsi, "Kodvwa ubukeka ukhatsele kakhulu futsi ukhandlekile."

Watsi, "Nginjalo."

Watsi, "Yebo-ke, hlala phansi lapha futsi utsatse situlo sami." Wase utsi, "Ngiyabona unelikhadi lekukhulekelwa. Mhlawumbe wena u...Mnaketfu Branham utokhulekela loluswane lwakho?"

Watsi, "Siyetsema kutsi lenombolo itobitwa."

Wase utsi, "Yebo-ke, nami ngiyetsema." Watsi, "Dzadze, ungumKhristu?"

Watsi, "O, yebo!"

Watsi, "NgingumKhristu nami." Wase utsi, "Kusukela ngingleti lapha, Moya weNkhosi bekangitjela, 'Khulekela loloswane.' Unganginika imvumo na? Ngiyati uMnaketfu Branham utolukhulekela loloswane uma lubitwa. Futsi usolo nje ubambe likhadi lakho, utokutffola." Watsi, "Kodvwa uma ngibeka tandla tami etikwaloluswane, bese nje nginiketa umkhuleko lomncane kutsi ngitente ngitivele ngincono, futsi ngiphume ngaphansi kwaloko lokungibitako, kunga—kungakukhuba yini?"

<sup>42</sup> Watsi, "Ngani, impela ngeke, S'thandwa. Lukhulekele loloswane." Futsi kwakuluswane loluncane loluluhlata sasibhakabhaka, futsi ngako lo—lodzadze lomncane walukhulekela. Waniketa lodzadze situlo sakhe, wase

ukhwela wenyukela kuvulande losesitezi sesitsatfu futsi bekemile. Lomunye umnaketfu longumKhristu etulu lapho, angumnumzane lohlonipheke ngalokwenele kutsi asukume bese uniketa lodzadze situlo, ngako wahlala phansi.

<sup>43</sup> Cishe sekuyihhafu yeli-awa kamuva, ngingena emhlanganweni, ngakhulumu imizuzu lembalwa, ngabita emakhadi ekukhulekelwa; nalona wesifazane bekanguwesitsatfu noma wesine elayinini naloloswane. Wase uhlala lapho, futsi watsi, “O, ngiyabonga, Nkhosi. Manje, ngimdzabukele kakhulu lowomake lomncane, ngikhulwa kutsi loluswane lutolulama manje, ngoba uMnaketfu Branham... Wesitsatfu nje noma wesine, utofika kulowo.” Watsi, “Ngiyabonga, Nkhosi,” lomake lomncane ahleti etulu lapho, avela loloswane. Kulungile.

<sup>44</sup> Khona-ke ngesikhatsi ngenyuka, ngacala kukhulekelwa loluswane, ngesikhatsi lodzadze enyuka, kutsi, ngambuka ngase ngitsi, “Manje, luswane lwakho luluswane loluluuhlata sasibhakabbaka. Ululetse lapha kutsi lukhulekelwe. Futsi manje, ligama lakho unguNkkt. *S'bani-bani*, futsi uvela endzaweni *leTsite-tsite*; kodvwa loluswane seluvele lophilisiwe. Bekunewesifazane lobekanemtfwalo enhlitiyweni yakhe ligama lakhe nguNkkt. *S'bani-bani*, lohleti etulu lapha kuvulande losesitezi (wekucala ekugcineni emgceci wesine kuvulande wesitsatfu losesitezi), ukhuleke umkhuleko wekukholwa waloluswane; neluswane seluvele lophilisiwe.” Wavele wacishe wadzilika esitulweni sakhe. Niyabona na?

<sup>45</sup> Manje, kube-ke bekangakakwenti loko na? Niyabona kutsi ngicondze kutsini na? Manje, lowo wesifazane bekayoba neluelo lolunengi ngaloloswane, make eluswaneni kunoma kwendlula labengiyobanalo ngaloluswane. Niyabona na? Nalomake angu... Niyabona na?

<sup>46</sup> “Ngabe sonkhe singayenta yini imimangaliso?” Yebo. Uma ucondziswa nguMoya loNgcwele kwenta imimangaliso, hamba ukwente, ngoba nguMoya loNgcwele locondzisile.

<sup>47</sup> Manje, uma lowo wesifazane bekangakwentanga loko Nkulunkulu bekamtjеле kona, mhlawumbe kwakuyobakhona kusola kuMoya kuye (niyabona na?), futsi bekayobe akamlalelanga Nkulunkulu. Sonkhe sikhatsi, uma ungumKhristu futsi intfo letsite ikuncenga kutsi wente lokutsite, hamba ukwente. Hamba uyente; ungayingabati; hamba uyente.

“Ngitsandza kubuta umbuto. Ngabe...?” Nankhu lomunye wayo, noma ngitfole longesiwo... Ya, ngi...! Lowo ngulomunye wamanje ekuseni. “Lowesifazane logcoke emaphijama, ngabe kutingubo tebesilisa yini?” Kungahle kube uhlangahlangene ngalapha kulena leminye.

“Mnaketfu Branham, ngabe Nkulunkulu bekenta yini intfo...ngabe Nkulunkulu...ngabe ngangenta intfo leyenteka ngesikhatsi letheyiphu...?” O, yebo, sibe nawo lowo manje ekuseni. Ngahle kube ngibe naleminye yaleyo seyihlangahlangene. Bengifanele ngiyidzabule, kodvwa nje ngiyakutondza kukwenta.

**380. Mnaketfu Branham, bobani labayogcwalisa umhlaba ngaphandle kwaleliDolobha laseZulwini?**

**381. Chaza ngengelosi yemuntfu ngamunye lehlala nabo kusukela ekutalweni kuya ekufeni.** Ngumbuto lomuhle kakhulu.

<sup>48</sup> Ngiyakutondza kuyendlula lena; iyimibuto lemhile. Futsi ngifuna bantfwana bami—bami batati letintfo leti. Niyabona na? “Manje, bobani labayogcwalisa umhlaba ngephandle kweliDolobha?” Ngephandle, kuyoba ngulabhahlengiwe labayogcwalisa umhlaba, ngephandle kweliDolobha, kodvwa abayuba ngulabakhetsiwe neMlobokati lobitiwe. UMlobokati uyohlala ngekhatsi eMbusweni neNkhosi. Ngephandle kuyoba ngemakhosi emhlaba lasebentako futsi aletse tetfulo tawo, aletse tawo...hhayi kukhandleka, kodvwa uletse titselo tawo eDolobheni. Neminyango ingeke ivalwe ebusuku.

<sup>49</sup> Manje, e...Manje, lokuKhanya loku esicongweni sentsaba akuyukhanyisa umhlaba wonkhe, Kuyokhanyisa kuphela leliDolobha. Kodvwa Kungabonakala ebangeni lelitinkhulungwane temakhilomitha mhlawumbe; kodvwa Akuyukhanyisa umhlaba, ngoba liBhayibheli latsi, eVeni leLisha, kutsi kusukela kulelinye liSabatha kuya kulelinye nasekusukeni kulenyen—kusukela kulenyen inyeti kuya kulenyen (niyabona na?) kuyoba bantfu benyukela embikweNkhosi eZiyoni, benyukele eDolobheni kutokhonta.

<sup>50</sup> Futsi manje, bayoba ngephandle kweliDolobha, hhayi uMlobokati, kodvwa bantfu labakhuphuka ekuvukeni kwesibili bayoba balimi bemhlaba, njengoba nje Adamu bekanjalo, nakanjalonjalo, nebanakekeli bensimu. Kodvwa iNkhosi neNdlovukazi bayosala eDolobheni.

<sup>51</sup> “Chaza ngengelosi yemuntfu ngamunye lehlala nabo kusukela ekutalweni.” Manje, uma ucaphela...Manje, loku kutsite kujula kakhudlwana. Manje, angizange...ngivele ngawucupha nje. Manje, i...Incenyen yawo ibhalwe ngekuthayishwa nalenye ingepeniseli—noma ipheni.

<sup>52</sup> Manje, ikhona iNgelosi, kodvwa leNgelosi yeNkhosi letikake labatesabako...labamesabako Yena. Niyabona na? Manje, akuketseniswa kutsi toni sinetiNgelosi, ngulabhahlengiwe kuphela lonetiNgelosi. Benikwati loko na? TiNgelosi teNkhosi tikake labamesabako Yena.

<sup>53</sup> Manje, tiNgelosi tititfunywa. Ngifuna nicaphele kutsi Kuphelele kakhulu, futsi kutofakazela kumiselwa ngaphambili kini. Niyabona na?

<sup>54</sup> Manje, uma luswane loluncane lusabunjwa ngaphansi kwenhlitiyo yamake... Nani bantfwana labancane leniticondzako letintfo leti, niyabona, iNkhosi yaniniketa make. Futsi wanitfwala ngaphansi kwenhlitiyo yakhe, ngoba nisondzele enhlitiywani yakhe. Kwase-ke, ngalelinye lilanga iNkhosi yehla yase inikhulula enhlitiywani yamake, kusuka enhlitiywani yakhe, kodvwa niyohlala njalo nisenhlitiywani yakhe.

<sup>55</sup> Manje, ngesikhatsi lomtimba lomncane ubumbeka, lomtimba lomncane wemvelo ubumbeka kumake, kunemtimba wakamoya wasemhlabeni losewulungele kwemukela lomtimba wemvelo masinyane nje uma sewutelwe. Manje, loluswane latalwa lunemamasela laphilako, inhlitiyo leshayako, kodvwa kute umoya wekuphila kuyo. Ngemamasela nje ladzikitako... Niyabona na? Khona-ke, niyabona, uma kubekhona lokwehlukile kuloko, uma bewungekho umoya lobewufanele ungene kuwo kamuva, khona-ke umoya wetfu bewungasishiya, futsi besingeke sisaphefumula futsi sibe sisaphila. Kodvwa uma lomtimba ungayemukeli i-oksijini e... noma umoya (kudvonsa nekuhipha kwemaphaphu etfu), khona-ke besiyobe sifile.

<sup>56</sup> Manje, kodvwa uma make... Luswane loluncane lucatsatwa emhlabeni lusuka enhlitiywani yamake. "Lwacatsatwa," niyakucondza lelengikushoko, kutsi ndlelani lengi... sizatfu ngikusho ngalendlela. Uma lololuncane, luswane lucatsatwa, kwentekani na? Lutsi nje lungavela, uma lungacali kukhala, dokotela, umbelekisi, noma ngabe yini, uyolubhansuta [UMnaketfu Branham ushaya tandla—Umhl.], alwelule. Lufanele lubenekwtfuka, futsi kubese kwentekani?

<sup>57</sup> Caphelani, lomake, angaba ngulone lunya neludlame kakhulu, kodvwa ngaphambi nje kwekutsi loloswane latalwe, kunemusa lotsite longenako. Nike namcaphela make uma sekatobeleka? Kukhona intfo lemmandzi ngaye; uhlala njalo embetse lobobummandzi. Kungenca yekutsi leyongelosi lencane, umoya lomncane, sitfunywa lesincane kulelitabernakeli lelincane sesilungele kuphuma singene emhlabeni. Bese-ke, uma lengelosi lencane itongena emtimbeni (leyo yingelosi lencane yasemhlabeni, umoya lomiselwe nguNkulunkulu kutsi utsatse lomtimba), khona-ke loloswane lutofanele lube nekutikhetsela. Lwenta sincumo salo. Khona-ke ngesikhatsi loku kwenteka, khona-ke, uyabona, iNgelosi yeNkhosi manje ingena lapha, lokungumtimba wakamoya, loPhakadze.

<sup>58</sup> Lona ngumoya lofako emtimbeni lofako; kodvwa manje, wena awukwati kuba semitimbeni lemibili ngasikhatsi sinye, kodvwa kungaba netimvelo letimbili kuwe ngasikhatsi sinye.

Manje, imvelo yeMoya weNkhosi... Ngesikhatsi utalwa kabusha, awutalwa ngekwenyama, njengoba lwalunjalo nje luswane; kodywa lokwentekile, kutalwa kwakamoya kufanele kute kuwe. Futsi ngesikhatsi lokutalwa loku kwakamoya kukhula enhlitiyweni yakho, kwaNkulunkulu, kunewenyama noma umtimba wasezulwini lokhulako kwemukela lowomoya. Futsi uma kuphila kushiya lomtimba, kuya kulowomtimba. Njengoba nje ngesikhatsi umtimba wetfulwa emhlabeni, umoya uyangena, futsi ngesikhatsi umoya uphuma emtimbeni, kunemtimba lolindzile. "Ngoba siyati kutsi emvakwekuba lelidvokodvo lidzilitwa, sinalo leselivele lilindzile." Niyabona na? Nguloko-ke, umtimba wakamoya webantfu.

### **Mnaketfu Branham...**

Manje, lena ifanele ibe yi... Kunesicumbi sayo lapha, kubukeka shengatsi lokungenani lishumi noma lishumi nesihsianu. Konkhe kubhalwe ephepheni, iuhlobo lolufanako lweliphepha, kubhalwe ngemshini, nakanjalonjalo. Ngitotama kufika kuyo ngalokukhulu kushesha lokungenteka. Singaphuma e...ngalokukhulu kushesha lesingawkwenta.

- 382. Mnaketfu lotsandzekako, bekangeke yini Jesu emukele kukhontwa eSambulweni nguJohane ngesikhatsi awa kutsi a... Kungani Jesu angakwemukelanga kukhontwa eSambulweni nguJohane ngesikhatsi A—ngesikhatsi Avumela kukhontwa embikwakhe na? Kungani Jesu angakwemukelanga kukhontwa ngesikhatsi Johane afuna kuMkhonta na?**

<sup>59</sup> Mnaketfu lotsandzekako noma dzadze, nomangabe ngubani, kwakungesuye Jesu longakwemukelanga kukhontwa. ESambulweni 22:8, utofundza kutsi kwakungumprofethi, ingelosi, lengakwemukelanga kukhontwa. Ngesikhatsi Johane awa phansi kutsi akhonte ingelosi leyayimkhombise letintfo leti, yatsi, "Ciniseka kutsi awukwenti, ngngulofana nebazalwane bakho. Ngingulomunye webaprofethi." Niyabona, niyabona na? "Ngingumnakenu kanye nawe, tinceku kanye nawe, lomunye webaprofethi; nika Nkulunkulu kukhontwa." Kwakungesuye Jesu longakwemukelanga, kwakungumprofethi longakwemukelanga.

- 383. Mnaketfu Branham lotsandzekako, yini umehluko ngesikhatsi Jesu aphefumulela kubafundzi wase utsi, "Yemukelani Moya loNgcwele," futsi ngesikhatsi be—ngesikhatsi bebatoya ekamelweni lelisetulu kutsi balindze na?**

<sup>60</sup> Kwakusetsembiso Labanika sona, waphefumulela etikwabo setsembiso saKhe, watsi, "Yemukelani Moya loNgcwele." Kwakusetsembiso. Baya ekamelweni lelisetulu kuyolindzela setsembiso kutsi sigcwaliseke.

<sup>61</sup> Intfo lefanako kungesikhatsi sibeka tandla etikwenu kutsi niphiliswe, bese uchubeka ngemsebenti wakho ulindzele setsembiso kutsi sigcwaliseke.

**384. Mnaketfu Branham, ngabe Jesu wantjintja sifihlabuso senyama tikhatsi letinengana ngesikhatsi abonakala kubafundzi emvakwekuvuka kwaKhe na?**

<sup>62</sup> “Ngabe Wasintjintja yini sifihlabuso saKhe senyama?” A—angeke ngati, ngoba ngicabanga kutsi lokwakungiko, Akasintjintjanga sifihlabuso saKhe lapho. Intfo Layenta, Wakugodla kubona kwabo noma kuMati.

<sup>63</sup> Njengalabo lebebavela e-Emawuse, bahamba naYe lusuku lonkhe futsi bekakugodlile. Futsi babona umuntfu elusentseni ngalesinye sikhatsi badweba lapho lebebakadze badweba khona; Watsi, “Bantfwana, kukhona leninako na?”

Base batsi, “Asitsatsanga lutfo, sishikashikeke busuku bonkhe.”

Watsi, “Phonsani ngakulelinye luhlangotsi.” Wase ucukula sonkhe sicuku setinhlanti, base bayati-ke kutsi kwakuyiNkhosi. Ngicabanga kutsi kwakungesiso sifihlabuso saKhe lesantjintjwa, ngicabanga kutsi nje kwakungemehlo bantfu lokwagodlwa.

**385. Mnaketfu Branham, yini umehluko, uma—uma nomayini, ekhatsi kweNgelosi yeNkhosi neNkhosi, cobolwaYo?**

<sup>64</sup> Ingelosi yeNkhosi sitfunywa lesivela eNkhosini, neNkhosi lucobo lwaYo ngulowoMunfu, hhayi umuntfu wengelosi, ingelosi levela eNkhosini. Ake ngikukhombise. Ngekukhulumma ngekwasmhlabeni nayi ingelosi levela eNkhosini. Ngekukhulumma kwasmhlabeni nayi ingelosi levela eNkhosini. Sati kanjani-ke kutsi titingelosi letivelia eNkhosini na? Uma tiletsa Livi leNkhosi. Kodvwa uma titama kuLiphendvuketela, alivel i eNkhosini khona-ke, niyabona, niyabona, kutama kuLenta intfo leLingayisho. Nje kusho nomayini...

<sup>65</sup> Khona-ke kukhona iNgelosi lengetulu kwemvelo leyehla ivela eNkhosini, siTfunywa njengaGabriyeli, na—naMikhayeli, Mhlonyane, nakanjalonjalo, emagama ato.

**386. Mnaketfu Branham, yini lebonakala ingakalungi elusukwini uma siphila, yekuba likholwa nekulandzela uMlayeto nesitfunywa sanamuha, uma ungenawukhuleka njengoba bewungatsandza na? Lowo ngumbuto lomuhle.**

<sup>66</sup> Ngiyakhola mnaketfu, dzadze, noma ngabe ngubani lowubutile, yimbangela yetimo tesikhatsi. Imvuselelo seyiphelile. Imvuselelo seyichubeke iminyaka letsite lelishumi nesihlanu, futsi ayizange ihlale ngaphambi kwekuba cishe netegula kweminyaka lemitsatfu. Ngikholwa kutsi seyemukele

imvuselelo yayo yekugcina. Futsi ngikholwa kutsi kungako ungenawukhuleka futsi uve useMoyeni njengoba wawuvamisile. Kungoba imililo yemvuselelo sewucishile.

- 387. Mnaketfu Branham, ngicela uchaze kutsi wati kanjani umuntfu uma acabanga imicabango yakhe lucobo, noma uma develi abeka imicabango engcondvweni yakhe kumenta acabange lokungakalungi, ikakhulukati, uma wati kutsi awufuni kuyicabanga.**

<sup>67</sup> Khona-ke, uma kuphambene neLivi, kucabanga kwadeveli. Uma kuhambisana neLivi, kucabanga kwaNkulunkulu. Uma kuyimicabango lengakalungi, ngudeveli. Uma kuyimicabango lemhle yeLivi neyaNkulunkulu, kucabanga kwaNkulunkulu.

- 388. Uma ludzaba lungahle lube kutsi develi ubeka imicabango engcondvweni yakho ngentfo letsite, ingancotjwa kanjani noma isuswe na?**

<sup>68</sup> Tsatsa kona kanye nje lokuphambene nako. Uma develi akwenta ucabange kutsi—kutsi—kutsi u... Uma wati kutsi ungumKhristu, futsi yena utama kukwenta ucabange kutsi awusuye umKhristu, tsatsa nje lokuphambene, utsi, “NgingumKhristu.” Kuphela nje uma sentakalo sakho sifanelana neLivi laNkulunkulu utsi, “NgingumKhristu.” Noma nguyiphi lenye intfo, indlela lefanako.

**Uma uphendvula loku, ngicela ungikhulekele kutsi ngincobe loku, njengoba ngingekho esimeni lesikahle.**

<sup>69</sup> Nkulunkulu akakuphe kuncoba kwakho, noma ngabe ungebani. Kwangatsi imicabango yakho nje ingabuyela emuva ngco kulolunye luhlangotsi bese utsi, “NgingumKhristu; ngilikholwa. Sathane, awunako kubambelela kimi.”

<sup>70</sup> Ecinisweni, ngime khona lapha manje ngisho intfo lefanako, ngivimbela kuculeka khona lapha epulpiti. Kunjalo. Kane noma kasihlanu ngicishe impela ngacumbeka phansi epulpiti. Lelo liciniso. Nkulunkulu uyati kutsi loko kucinisile.

- 389. Uma umuntfu acondza kutsi unekutibukela phansi, noma lolunye luhlobo lwekutedzelela, angakuncoba kanjani loku na? Ngako, kungaba kutsi uma bekanguye kuphela umntfwana lowabangela loku ebusheni bakhe basekucalemi na?**

<sup>71</sup> Tsatsa kona impela lokuphambene naloko. Uma njalo ufunu indlela yakho, naloyomntfwana lomncane munye longahloniphi lofuna njalo kuba nayo yonkhe intfo endleleni yakhe, jika ubuyele emuva ngco nhlangotsi tonkhe bese unikela ngayo yonkhe intfo lonayo ngalenyne indlela. Uma uligovu futsi ufunu kutigcinela yonkhe intfo, khona-ke cala wephane ngako konkhe lonako. Uyabona na? Yenta nomayini... Nje hamba ngalokuphambene. Nguleyondlela yekuncoba nomayini, likhambi.

<sup>72</sup> Une...Wami lomdzala, make waseningizimu bekavamise kutsi atsi, "Linceba lenja lelashwa ngeboya bayo." Naloko kusebenta ngalendlela futsi.

**390. Mnaketfu Branham, mphumelelo yini lesifanele siyekele bantfwana betfu labangakabi mabhungwana nematjitjana bahlanganye kuyo na?** (Ngiyacolisa, kutsi...) Nguyiphi imidlalo lokufanele bantfwana betfu labangakabi mabhungwana nematjitjana balangatelele, bahlanganye kuyo. Futsi, sifanele sentenjani kutsi sibasite bakhetsé labangatimatana nabo?

<sup>73</sup> Bagcine banebangani labamaKhristu ngako konkhe longakwenta. Bagcine ne...Uma kuyintfombatane, yigcine nemantfombatane langemaKhristu; labafana labangemaKhristu, ngalapha nangalapha. Uma sekamdzala ngalokwenele kutsi atsandzane nemfana, ciniseka kutsi uhambisana neluhlobo lolufanele lwemfana. Ungayikhutsati kunoma ngumuphi lomunye umfana kungenjalo, noma umfana entfombataneni. Uma itsandzana nalongakholwa, tama kuyikhutsata kutsi itsandzane nelikholwa, futsi ngalapha nangalapha. Yenta likhaya lakho libe lihle. Yenta likhaya lakho libe yindzawo lapho indvodzakati yakho noma indvodzana ingeke ibenemahloni kuletsa lababangani babo embikweyise nenina, nasendlini yabo; futsi yenta likhaya lijabulise kakhulu kutsi bayotfokota ekhaya lakubo kuhlala lapho.

Oooo, hhe, nankhu wesikhombisa ilandzelana. Anginawuhamba kodvwa nje kwelula ngemizuzu lembalwa.

**391. Mnaketfu Branham, ngabe utentile yini titatimende madvute nje mayelana nalowomnyaka welibandla sewuphelile, iLawodisiya na?**

<sup>74</sup> Cha, angizange ngitsi sewuphelile. Uma ngakusho, awuvisisanga kahle, noma ngakusho ngalokungesiko. U... Lona ngumnyaka welibandla wekugcina; kuphela kweminyaka yelibandla, iLawodisiya. Awukapheli; uma uphela, liBandla selihambile. Ngako kuphela nje uma liBandla lisekhona, awukapheli. Niyabona na?

**392. Umnyaka welibandla uphela futsi ubemnyama khwishi, uMlobokati uyabitwa, sesivele singene esikhatsimi sekuhlupheka lokukhulu?**

<sup>75</sup> Cha, cha, cha, wena u...Bengifisa kwangatsi ngabe bengingabe nginalesinye futsi sikhatsi kuloko. Niyabona, niyabona na? UMlobokati, uma Akhishwa ebandleni, khona-ke umnyaka welibandla uyokuma. ILawodisiya ingena encushuncushwini; uMlobokati uya eNkhaitimulweni; nnesikhatsi sekuhlupheka lokukhulu singena etikwentfombi ntfo lelele iminyaka lemitsatfu nehhafu ngesikhatsi Israyeli atfola siprofetho sakhe; khona-ke kuhlupheka lokukhulu kuyangena etikwa-Israyeli; bese-ke kufika imphi yase-

Amagedoni lebhubbisa yonkhe intfo. Bese-ke, uMlobokati abuye neMyeni iminyaka leyinkhulgwane, kubusa kwesikhatsi seminyaka leyiNkhulgwane; emvakwaloko kufika siHlalo sebukhosи lesiMhlophe sekweHlulela; emvakwaloko kufika emaZulu laMasha neMhlaba loMusha neliDolobha leLisha lehla livela kuNkulunkulu livela eZulwini. LiPhakadze nesikhatsi kuhlangana khaca ndzawonye.

- 393. Moya loyiNgcwele unitjelile kutsi emaCilongo akaphatselani ngalutfo neMlobokati. Ngabe leTitja letiSikhombisa kukhona yini letiphatselene ngako natsi na?**

<sup>76</sup> Ngitolindza ngibone kutsi ngabe Moya loyiNgcwele uyakwembula yini ngaleyondlela. Angikati.

- 394. Ngabe lomphrofethi waMalakhi 4 uyoba ngulowo lobitela ngephandle insali yebeTive yaseSambulweni 7:9, ngisho naloku bendlula kusosikhatsi sekuhlupheka lokukhulu?**

<sup>77</sup> Cha, cha! Emvakwe—kweSambulo 7, kulapho la abona khona tinkhulgwane letilikhulu nemashumi lamane nakune tibekwe khona, futsi emvakwaloko wabona kukhuphuka, abuya kwakungulesosibalo lesikhulu lebesingeke sabalwa ngumuntfu lobekanguMlobokati. Itoba ne...I...Malakhi 4 utophela neMlobokati sekatsetfwe, ne...khona-ke i...lelicembu la—la-Eliya na-Elisha libuyela emhlabeni kutsi li...Libandla kutsi liyokwendlula esikhatsini sekuhlupheka lokukhulu, kodvwa Eliya na-Elisha angeke batihlanganise ngalutfo nentfombi ntfo lelele (tibeTive); bayotfunyelwa kuphela kumaJuda.

- 395. Ngabe lemiDvumo leSikhombisa lelingana netimfihlakalo letisikhombisa seyivele yembuliwe yini? Ngabe yembulwa etiMphawini letiSikhombisa, kodvwa noko i—kodvwa noko isengakatiwa kitsi njengemiDvumo?**

<sup>78</sup> Cha, yembulwa etiMphawini letiSikhombisa; yayimayelana naloko-ke lemiDvumo. Yayitokwembula...ImiDvumo leSikhombisa leyayivakalise emaphimbo ayo futsi akekho lowakhona kwati kutsi kwakuyini...Johane wati kutsi kwakuyini, kodvwa walelwa kutsi ayibhale. Watsi, “Kodvwa ingelosi yesikhombisa, ngetinsuku tekuvakalisa kwayo, timfihlakalo letisikhombisa temiDvumo leSikhombisa yayitokwembulwa.” Nalengelosi yesikhombisa isitfunywa semNyaka weliBandla weSikhombisa. Niyabona na?

- 396. Uyakholwa yini kutsi ngaletinye tikhatsi uMlobokati lomncane lophilako uyobutsana ndzawonye ndzawanatsite futsi abenetintfo tonkhe ngalokufanako, njengoba kwenta uMlobokati wekucala, mhlawumbe ngaphambi nje kwekubuya kweNkhosi Jesu emafini?**

<sup>79</sup> Manje, bangibute kutsi ngakukholwa yini. Ngingeke sengikufakazele ngemiBhalo, kodvwa mhlawumbe kuyofika sikhatsi, mhlawumbe, angati. Kungahle kubekhona nje...

Niyabona na? Uma bekungabanjalo, bekunganiketa inkhomba yekusondzela kwaKhe lokusedvute, ngekuba njalo...Watsi, "Kodvwa Ufika njengelisela ebusuku." Niyabona na? Uta e... Njengaleyoncwadzi lengayifundza ngaJuliet...*Romeo naJuliet*, Uyafika futsi—futsi ahlwitse uMlobokati waKhe ebusuku. Uhlwitfwa ngesikhashanya, ngekucwabita kweliso. Niyabona na?

<sup>80</sup> Futsi kungabateka kakhulu kutsi ngabe kuyoba ngaleyondlela, ngoba liBhayibheli latsi, "Bayoba bibili embhedzeni; Ngiyotsatsa munye ngishiye lomunye; futsi babe bibili ensimini, futsi Ngiyotsatsa munye ngishiye lomunye." Niyabona na? Ngako mhlawumbe ba...Emhlabeni wonkhe, angeke babutsane endzaweni yinye kutsi bahlanganyeles tintfo letifanako. Kodvwa emacembu lamancane abo ayobe ahlakateke umhlabo wonkhe.

<sup>81</sup> Ngiyakhola, mhlawumbe uma iNkhosi ivuma, leli licembu lelincane laWo. Mhlawumbe lelinye licembu lelincane e-Asiya, linye entasi ejaliman, linye entasi kulenyen indzawo. Ngesikhatsi ngibone umbono weMlobokati kulolobunye busuku, Bentiwe ngulabavela emaveni ngemave. Niyabona na? Ngako uMlobokati angeke abutsane avela endzaweni yinye, Uyobutsana uvela emhlabeni wonkhe. Futsi loko impela kucinisekisa ngeLivi, futsi alikaze Livi libe liphutsa. Futsi kulesikhatsi lesi, kanjalo futsi nembono awukaze ubeliphutsa, ngoba bewuhambisana neLivi.

**397. Ngabe nomangubani lonembhabhatiso weliciniso nalongiwo mbamba waMoya loNgcwele kuleli-awa angeke abeseluHlwitfweni lweMlobokati? Ungachaza na? Sitjele kutsi singakwentelani noma ngayiphi indlela kusita sente umtfwalo ube lula.** Manje, akumnandzi yini loko na? Niyabona na?

<sup>82</sup> Cha, kute intfo leningayenta njengamanje.

<sup>83</sup> Yebo, emakholwa mbamba lelibhabhatiswe kuMoya loNgcwele liyoba kuMlobokati. Kusobala, bakhetsiwe futsi babitelwe ngephandle. Intfombi ntfo lelele yayite emafutsa. Leto letatinemafutsa tangena, kodvwa i...

<sup>84</sup> "Yini lesingayenta kwenta umtfwalo ube lula na?" Yebo, mnaketfu, dzadze, noma ngabe ngubani lobhala loku, ngikhulekele; nguleyontfo letendlula tonkhe yekwentiwa. Ngiyabonga. Angiyidzingi imali. Ngi...Lenengi yaloko iyangena kutsi inginakekele. Ayibongwe iNkhosi ngaloko. Angitidzingi timphahla. Sikhatsi lesinengi kakhulu bantfu labangipha timphahla tami lengitigcokako. Nebangani bami netintfo bangipha timphahla. Futsi ba...Ngitfola imali leyenele kutsi ngondle umndeni wami; nguloko kuphela lesikudzingako. Kubonakala kwangatsi...Futsi ungangikhulekela noko, ngoba ngiludginga sibili lusito lwakamoya.

**398.** Kubonakala kwangatsi emkhatsini webafundisi beLivi, kutsi sinalomncane noma asinamtfwalo wekukhuleka, kushumayela, kuzila kudla, noma ngemiphefumulo lelahlekile lengahle kube isasolo ingephandle lapho ndzawanatsite emhlabeni. Ungasita usitjele kutsi sentenjani ngalesimo lesi? Siyabonga kakhulu, Mnaketfu Branham, ngaloku. Lowo kufanele kutsi ngumfundisi. Akalisayini ligama ngalawa livi.

<sup>85</sup> Mnaketfu... Ngidzingeke kutsi ngiyiphendvule ngesikhatsi ngikhatsese, ngikhandlekile, futsi ngitsite kutsi, niyati, ngingativa ngikahle kakhulu, ngako ngi—ngiyetsema kutsi kuyayiphendvula imibuto. Ngi—ngiyakubonga kakhulu futsi ngi—ngikukhohliwe kutsi bekuyini lebengitomphendvula ngako.

<sup>86</sup> Bashumayeli, mfundisi, kungani sinalemitfwalo... singenamtfwalo ngemiphefumulo lelahlekile. Ngikholwa kutsi ku—kushoda kwemvuselelo. Ngikholwa kutsi sifanele sitame kukhuleka kuNkulunkulu kutsi asiphe luvelo ngemiphefumulo lelahlekile kuze kubuye Jesu.

**399.** Mnaketfu Branham, uyakholwa yini kutsi wonkhe umuntfu lonaMoya loNgcwele ukhuluma ngetilimi na? (Cha.) Ngiyati kutsi utsi kukhuluma ngetilimi—kukhuluma ngetilimi akusiko kwebufakazi baMoya loNgcwele. Beninga... BaseKhorinte bekuCala 12:30, ngicela uchaze. Ungangitfolela kubaseKhorinte bekuCala 12:30? Ngicabanga kutsi, “Bonkhe bakhuluma ngetilimi na?” noma lokunjalonjalo; anginasiciniseko. Ngitotama kutfola lomunye ngesikhatsi basawuphendvula.

**400. Mnaketfu Branham, ungamchaza yini Jobe 14:21?**

<sup>87</sup> Yebo. Jobe 14 utsi, “Uma umuntfu afa, uyophindze aphile yini?” O, uma umuntfu afa...Jobe, akhuluma ngekuvuka ekufeni. Ngicabanga kutsi ngaba nawo lowo ngalolokunye kusa, kwakungesiwo? Noma ngabe lowo wawusentasi endlini kaCharlie? Nkkt. Cox bekalapho ndzawanatsite. Jobe, utibonile timbali kutsi tifa kanjani tiphindze tibuye tiphile futsi, kodywa wesilisa wangena emhlabatsini futsi wangabuyi. Kwase-ke kuyachazwa kuye kutsi ikhona intfo leyayonile. Bekafuna umlamuleli emkhatsini wakhe naNkulunkulu, wase-ke ubona kufika kweNkhosi.

<sup>88</sup> Kuyini, Mnaketfu? [UMnaketfu Branham unengcogco nalomunye umnaketfu—Umhl.] Ngicabanga kutsi loko bekubaseKhorinte bekuCala 12:30. Ya!

“Bonkhe bakhuluma ngetilimi yini?” Nguloko lebengicabanga kutsi bekungiko, kodywa bengingenasiciniseko, ngikhatsese kanjena, kodywa... Cha! Bonkhe abakhulumi ngetilimi; bonkhe abahumushi; bonkhe abakusho loko. Bese-ke kuso sona kanye lesahluko lesilandzelako, “Noma ngikhuluma

ngelulwimi nebantfu netingelosi kepha ngingenalo lutsandvo, angisilutfo." Niyabona na? Pawula, ngalamany'emagama, abatjela, "Ngabe bonkhe bakhulumna ngetilimi yini? Impela, abakhulumi. Bonkhe bayaprofetha yini? Cha. Kodvwa langatelelani tiphiwo letinkhulu; kepha noko senginikhombisa indlela lenguyona iyinhle kakhulu." Niyabona na? Abakhulumi ngetilimi bonkhe.

**Utoba nayo yini lenye inkonzo yekubona lokufihlakele ngaphambi kwekutsi uhambe na? Uma ungeke ube nayo, kungenteka yini kutfola ingcogcisiwano lecondzene nami?**

Ngiyetsema kutsi ukwentile. Manje, angisenayo leminye leminengi kakhulu. Ake ngitame kuyitfola uma kungenteka ngikwente.

**401. Ngiyakhumbula ngikuva ucoca ngekubona intfo lebonakala idzabukisa yengelosi...yelukhozi lushayisa timphiko talo kuhhodle, luzabalazela kukhululeka. Nginamake loligugu lokulesosimo. Bekangavunyelwa kutsi abenebantfwana bakhe labatsatfu labashadile kutsi bete ekhaya iminyaka lemitsatfu, ngoba bebangayitfobel iimfundziso yeiyise wabo. Ungumshumayeli welihlelo. Make ufunu kuva loMlayeto wesikhatsi sekugcina, futsi angikwati ngisho nekuFikisa incwadzi kuye. Nguliphi lizinga lafanele atfobe aze efike kulo? Ngabe ikhona yini intfo lengingayenta ngaphandle kwekukhuleka na?**

<sup>89</sup> Leyo bekungaba nguyonantfo kuphela lebengingayati. Umyeni wakhe, angumfundisi, angamvumeli eve Livi. Ufunu kuLiva, kodvwa akamvumeli aLive, futsi mkhulekele nje. Ngikhola kutsi lowesifazane u—usindzisiwe, kusobala.

**402. Mnaketfu Branham, uma kungenteka kutsi umuntfu alahlwe futsi aphetsele esihogweni uma ala kuKhanya kweLivi, ngisho naloku nje anesentakalo selucobo sekulungisiswa nekungcweliswa na?**

<sup>90</sup> Yebo, mnumzane! Kunjalo impela.

**403. Uma usebentisa sisho kutsi uma singalikholwa Livi, siyohlukaniswa phakadze naKhristu, uchaza kutsi intfombi ntfo lesiwula iyophila phakadze, kodvwa tiyohlukaniswa neJerusalem Lensha lapho Khristu ayohlala khona neMlobokati na? Naba labo labangenaye Moya loyiNgcwele, batelwe kabusha njengoba umBhalo ukhulumna ngekutalwa kabusha. Uma kutalwa ngekwemvelo kudzinga emanti, ingati, nemoya, ngabe kutalwa kwakamoya akutidzingi yini tonkhe letigaba letintsatfu temusa ngaphambi kwekutsi umuntfu atalwe kabusha ngekweliciniso na?**

<sup>91</sup> Mbamba, ngikuchazile nje loko manje ekuseni, lokufanako, entfweni lefanako. Ufanele ube nato tonkhe tigaba. Uuakhulelwa nguMoya, njengeluswane nje luyakhulelwa, futsi

esibeletfweni samake, kodvwa abakatalwa baze bemukele Moya loNgewe. Loko kunjalo. Uyatalwa ke lapho. Awukaphendvuki, usesendeleni yekuphendvuka kuze kube ngulesosikhatsi.

<sup>92</sup> Kungaleso sizatfu kutsi tonkhe letimfihlakalo leti letinkhulu tatingenakuniketwa Luther, tatingeke tiniketwe Wesley, tatingeke tiniketwe umnyaka losandza kusendlula nje, umnyaka wePhentekhostali. Ngani na? Kwakusengakabi sikhatsi. Bebakhulelw esiswini nje. Manje, uMuntfu waKhristu, cobolwaKhe, iNdvodzana yemuntfu (niyacondza na?) atembula Yena lucobo enyameni yemuntfu, kwakungeke kufike kuze kubengumanje.

**404. Uma sikhatsi seminyaka leyiNkhulungwane sicala, bayosuswa kanjani labangakholwa emhlabeni na?**

<sup>93</sup> Labangakholwa bayokwehlela esikhatsini sekuhlupheka lokukhulu nentfombi ntfo lelele, nabobonkhe labo labanye (labangakholwa, nentfombi lelele), nensali ya-Israyeli letokhishwa.

**405. Mnaketfu Branham, ngesikhatsi labanye ba... lomunye angisukela noma “anginyatsela tintwane (Lona ungahle ube ngulomuhle.)—anginyatsela tintwane,” njengoba saga lesidzala sisho, kuvuka lulaka Iwami; ngingayincoba kanjani lentfo na? Ngiyati kutodzingeka kwentiwe yiNkholosi, kodvwa ngingentani enhlitiyweni yami na? Angiyifuni lentfo.**

<sup>94</sup> Photisa lulaka lwakho ngemkhuleko, bese untjintja ingcondvo yakho. Lapho...Angicageli kutsi kunebantfu labanengi kakhulu kulendlu labake baba nelulaka lolukhulu kwendlula lebenginalo kwase kucaleni. O, nga—ngangibanemlomo lobhamuliwe sonkhe sikhatsi. Futsi nga—nga—ngangitsetse incumbi yekudla kwami ngelutsi lwekunatsa.

<sup>95</sup> Make wami, njengoba nati, bekaliNdiya hhafu, nababe wami bekangum-Irishi, um-Irishi waseKentucky kuloko. Futsi wonkhe we...Bobabili bebanelulaka lolwenele kulwa nelisaha leliyindingilizi. Futsi ngaso sonkhe sikhatsi umlomo wami wawubhansutwa; ngangimncane kwekucala nje. Futsi bebangiphakamisa nje bese bangishaya bangilahle phansi. Futsi ngangibuye ngivuke; futsi baphindze bangishaye bangilahle phansi ngize ngikhone kakhulu ku...n gingabe ngisakwati kuvuka. Loko kuhlala kunjalo. Bese-ke uma sengikhona kuvuka, ngivuke futsi; baphindze bangishaye bangilahle phansi. Ngako nguleyondlela nje lenganginalo ngayo.

<sup>96</sup> Ngacabanga, “Ngingeke sengibe ngumKhristu.” Kodvwa ngesikhatsi Moya loyiNgewe angena emphilweni yami, loko kukwentile. Akusekho...

<sup>97</sup> Nganginewesifazane ngalesinye sikhatsi; ngaya kuyocima emalambu. Futsi ngalolosuku nganginetinwele ngetulu

enhloko yami. Lowesifazane watsi, “Wena lomncane, losilima lesinetinwele umcancatfo!”

Ngamtjela, ngatsi, “Sifazane, bewungakafaneli wetfuke kanjalo. O, awumesabi Nkulunkulu na?”

Watsi, “Wena lomncane, losilima lesinetinwele umcancatfo, kube bengifuna umuntfu lotokhulum kimi ngetintfo letinjalo, bengingeke sengitfole siphukuphuku lesinjengawe.”

“Whoo!” Wase-ke ungibita *ngesiduphunga*, ngeligama *lesiduphunga*. O hhe, kube loko kwakuchubeke umnyaka! Ngangihlala ngitsi, “Indvodza lengashaya wesifazane yayingesyo indvodza ngalokwenele kutsi ishaye indvodza,” kodvwa ngi—ngangingahle ngikwephule loko ngalesosikhatsi abita make wami ngeligama lelibi kanjalo. Kodvwa niyati kutsini? Akuzange ngisho kungiphathamise. Ngatsi, “Ngitokukhulekela.” Akungihlupanga nhlobo... Ngati ngaso lesosikhatsi kutsi kukhona lokwakwenteke kimi. Yebo, mnunzane! O, hhe!

<sup>98</sup> Niyabati bubi lengibente ngisengumntfwanyana, ngilwa! Ngacishe impela ngabulala emadvodza lasihlanu ngasikhatsi sinye. Ngatsatsa sibhamu lesikhulu silayishwe tinhlavu letilishumi nesitfupha, futsi ngesikhatsi labobafana bangishaya ngoba nganginguwaseKentucky, singekho lesinye sizatfu... Ngangingakwati ngisho nekuphakamisa inhloko yami. Lomunye bekangibamba ngetandla kanje, nalomunye bekema lapho nelitje esandleni sakhe wangiphihlita ngalo ebusweni, ngaze ngangabe ngiseva lutfo. Kungekho lutfo emhlabeni...

<sup>99</sup> Bebangibita ngesi “sikwanklela saseKentucky,” ngoba make wami, ngesikhatsi asemncane, impela bekabukeka afana neliNdiya (ngibuka sitfombe sakhe esikhashaneni lesendlulile), futsi bebatu kutsi bekaliNdiya hhafu. Futsi ngoba ngangiuwaseKentucky futsi yena anguwersifazane wemdzbabu, bebangibita ngesi “kwanklela, sikwanklela saseKentucky.” Futsi ngangingenatalfo emhlabeni lengangingalwenta kuko; kute lengangingakwenta ngoba ngatalelwaa eKentucky.

<sup>100</sup> Ngewukela lapho esikolweni, futsi ngangingenatimphahila tekugcoka, netinwele tami tilenga tite tiyofika entsanyeni yami. NaBabe... Make watsatsa libhantji laBabe lelidzala lashada ngalo, wase uyalijuba wangentela libhuluko kutsi ngiliccoke nangiya esikolweni kukwekulala kimi. Futsi ngi... Wase unggicokissa nemasokisi lamadze lamhlophe neticatfulo te-thenisi. Base batsi, “Uma ungabukeki ufana ‘nalocumbile’ waseKentucky.” Futsi—futsi konkhe... futsi loko... bese-ke, loko kwachubeka njalo yonkhe imphilo yami—tonkhe tinsuku tami tesikolwa.

<sup>101</sup> Nebafana labambalwa, ngoba ngahamba ngehla ngemgwaco nalenye intfombatane lencane futsi ngiyiphatsele tincwadzi tayo... Bebangafuni ngente loko, base bahlangana nami

entasi lapho base bayangishaya ngaze ngaculeka nje. Ngabatjela, uma bangangiyekela ngihambe, ngetsembisa kutsi ngangitocondza ekhaya ngco. Futsi ngako batsatsa... bangiyekela, bangikhahlela kane noma kasihlanu, bangishaya bangilahla phansi, base bangihwaya bonkhe buso bami. Ngase ngiya ekhaya, kanjena, ngenyuka ngidzabula ensimini yesihlahla semshanyelo.

<sup>102</sup> Nganginesibamu lesincanyana i .22 Winchester sibekwe etulu etikwemnyango. Ngefiike ngasitsatsa lesosibamu lesikhulu sigcwele tinhlavu, ngehla ngco ngidzabula ehlashaneni lemena, ngase ngibhaca eceleni kwemgwaco baze bafika ngalapho labobafana labasihlanu noma labasitfupha. Ngalindza nje baze befika, futsi ngesikhatsi befika lapho, bakhulum, batsi, “LowomKentucky utocondza kutsi ukuphi kusukela kuloku kuchubeke,” bachubeka kanjalo.

<sup>103</sup> Ngenyuka nencipho idvonsiwe esibhamini. Ngatsi, “Manje, ngumuphi kini lofuna kufa kucala, kute ungabukeli labanye?” Bacala kunswininita; ngatsi, “Ninganswininiti, ngoba nonkhe nitokufa ngamunye ngamunye.” Futsi ngangisho mbamba! Futsi kwatsi nje ngalesosikhatsi bacala kunswininita. Ngase ngiyadvonsa sancapha! Sibamu sancapha. Ngaphonsa lelnye inhlavu ekhatsi. Sancapha, sancapha; lenye inhlavu, sancapha, sancapha. Futsi ngapampa tinhlavu letilishumi nesitfupha emhlabatsini. Tonkhe tancapha. Nalobabafana bagijima, futsi bamemeta, futsi batishutheka egcumeni, nayo yonkhe intfo.

<sup>104</sup> Futsi emvakwekuba sebahambile, ngema lapho. Kwatsi sengitfukutsele kakhulu, ngaze nga—nga—ngangabe ngisakhala, ngangihleka njengesilima netinyembeti tigeleta emehlwani ami. Manje, lolo lulaka. Kube kwakungesinganca yaNkulunkulu, ngangiyoba ngumbulali.

<sup>105</sup> Ngase ngibutsa letotinhlavu ngase ngitibusela esibhamini, futsi, “Bha, bha”; betidubula nje kahle kakhulu njengasemihleni nje. Ukhulumu ngemusa!

#### **406. Tikuphi tintfombi ntfo letitiwula ngesikhatsi seminyaka leyiNkhulungwane?**

<sup>106</sup> Ngesikhatsi seminyaka leyiNkhulungwane tisethuneni. “Labanye labasele labafile abaphilanga iminyaka leyinkhulungwane.”

#### **407. Ngabe iyobakhona, noma ikhona yini manje indzawo yeMlobokati yekutsi abutsane ndzawonye kutsi ahlale kuyo, njengangesikhatsi Mosi ahola bantfwana baka-Israyeli na?**

<sup>107</sup> Ngitokuphendvulela wona lowombuto; kwembulwa nje kimi. Ngitokutjela liciniso. Yebo, mnumzane! Kunendzawo yawo wonkhe uMlobokati kutsi abutsane kuyo. Ufuna kwati kutsi ikuphi na? KuKhristu. Kuliciniso. Kubutsanwa nje lapho; sonkhe sindzawonye.

**408. Kuyangani lokutsi sikhente kube yintfo lenkhulu kangako kugcoka kwebesifazane (O, o, ngikutfolo kulona, anginjalo na?)—intfo lenkhulu ngekugcoka kwebesifazane nekuhhulwa kwetinwele, futsi sente...kungashiwo lutfo ngewesilisa noma indlela lagcoka ngayo na?**

<sup>108</sup> Yebo-ke, dzadze, ngitovumelana nawe ngentfo yinye. Indzawo yekucala, liBhayibheli latsi wesilisa akafaneli abe netinwele letindze. Futsi uma ubenetinwele letindze, bengingamtjela, ngalokufanako nje njengoba ngitjela wena. Yena uneliphutsa. Kodvwa linengi lebesilisa, incumbi yabo linjengami, alinato nhlobo. Kodvwa linengi labo liyatihhula tinwele tabo, babukeka njengebesilisa. Futsi manje, uma bangakwentanga, bayotjelwa kutsi bangenti kanjalo, kutsi bayekele tinwele tabo tikhule njengetinwele tewesifazane. Nitofola konkhe kwaloku etifungweni temshado nedivosi netintfo uma sishumayela ngako. Indzaba lenkhulu lenjengeyewesilisa...noma kugcoka kwewesifazane...

<sup>109</sup> Manje, wesilisa, indzawo yekucala, umtimba wewesilisa awusiso silingo njengewesifazane. Manje, wesilisa, mkhulu, mdzala, imilente leneboya, emadvolo lashayisene, sisu lesisabhodo, nayo yonkhe intfo, uyinyakanyaka nje lebukeka kabi kabi; futsi akukho lutfo ngaye lolungaba silingo. Futsi ngicabanga kutsi ubukeka ngekubukeka kwe “mfanekiso lobhicwe kwendlula yonkhe” kubona laba wesilisa eta ehla ngemgwaco, amcane noma amdzala, agcoke nalambhikini, nomangabe kuyini, niyati, ahamba ehla ngemgwaco. Ngicabanga kutsi kubonakala kuyintfo lebukeka ingcole kakhulu lengake ngayibuka. Kunjalo. Ngicabanga kutsi a—akati kutsi unguwasiphi sive (niyabona na? Loko kunjalo!), wesilisa loyokwenta intfo lenjengaleyo.

<sup>110</sup> Futsi niyati kutsini na? Ngisandza kuva nje tinyanga letimbalwa letendlulile, uMbutfo waseMerica utogcoka ngaleyondlela. Yebo! Umbutfo uphumna ngemnyaka lotako, noma emvakwemnyaka lotako, wonkhe ugcoke tikhindi. lesikhulu kanjani sicuku setatabane lesingatitfola na?

<sup>111</sup> Nkulunkulu wenta wesilisa abukeke njengewesilisa, futsi atiphatsise kwewesilisa, futsi agcoke njengewesilisa. Wenta wesifazane kutsi ente lokufanako, agcoke njengewesifazane, atiphatsise njengewesifazane, futsi abe njengewesifazane. Mayelana naloku manje ekuseni, mayelana...Umbuto uyavela mayelana newesilisa...[Lisayidi lekucala letheyiphu liphela ngalokungakapheleli nelisayidi lesibili licala ngalokungakapheleli—Umhl.]...Uma afuna ku...

<sup>112</sup> Uma wesifazane anetinwele letilula mbamba, futsi afuna kufaka lelinye lalawo “magundvwane” noma ngabe nikubita ngekutsini, ngicabanga kutsi loko ku...Umkami uyakufaka. Kuyi...Utsi tinwele takhe tilula, futsi unalolunye luhlobo

lolutsite lwentfo lets i ayibe yindingilizi lenkhulu kangako, ibukeka injengalelikhulukati, libhisikidi lelikhulu kwekweca. Futsi usonga tinwele takhe titungelete loko bese uhloma emaphini kuko. Futsi manje, i... Ngekubona kwami, loko-loko akukhatsati lutfo kuphela nje uma tinwele takho titindze.

<sup>113</sup> Umfundisi watsi umkakhe beka—bekagcekwa, ngoba bekane—nemibadlana etinweleni takhe. Ngase ngiyatfola embutweni, loko kuchaza pende noma kwenta umbala etinweleni takhe. Ngingeke ngasho kutsi loko kuliphutsa; anginalutfo ngako. Uma anetinwele letindze, nguloko kuphela lengingakusho ngako.

<sup>114</sup> Futsi manje, wesilisa... Lomuntfu ushito manje ekuseni basusa tinwele tabo, baphindze batibuyisele njalo. Manje, loku kutsite kufika lapha nako, mayelana nekuhhula tinwele. Niyabona na?

<sup>115</sup> Manje, uma—uma wesilisa ete tinwele, nemkakhe... Ngibevile besifazane batsi, "Yebo-ke, uma bengingahle ngitfole John... Ngicabanga kutsi bekangabukeka kancono uma a—uma afake sigcokwana lesitinwele tekufakwa. Ucabangani ngako, Mnaketfu Branham na? Ngabe kuliphutsa kuye kutsi akwente na?" Cha, mnumzane! Cha, nhlobo, akusilo liphutsa, akusilo nhlobo. Uma afuna kusifaka, loko kuhle, akukho ngetulu kwekfaka ematinyo ekufakwa kumbe nomangabe yini lefikako.

<sup>116</sup> Empeleni, nginematin yo lamatsatfu ekufakwa nanami. Ngifisa kwangatsi angibanga nawo. Aseluhwayeleni; kuhlala njalo kunciphisa liphimbo lami, futsi kusika lulwimi lwami, nayoyonkhe leny'intfo, kodywa kufanele ngibe nawo kute ngidle. Futsi uma ngi... Uma ngingesheya kwetilwandle kuleyomihlangano lengaphandle, ngifaka sigcokwana lesitinwele tekufakelwa; hhayi ngekubukeka kwaso, ngoba niyati ngiyaye ngime khona lapha uma ngingakatifaki tinwele etulu enhloko yami nomangabe bekuyini. Kwakungangenti kwehluka; ngilapha kumela Jesu Khristu. Kodywa uma ngima ngephandle lapho, cishe busuku bekucala kulesinye saletotiphepho tasekushiseni lokukhulu, ngebusuku lobulandzelako umphimbo wami sewubuhlungu kakhulu angisakhoni kuphuma lapho.

<sup>117</sup> Ngako, kube—kube bekuyintfo lebengifuna kuyenta, futsi ngativela kuyenta, bengingayenta. Yebo, mnumzane! Kute intfo lets i akungentiwa. Kute intfo leshoko, dzadze, kutsi ungeke ufake tinwele tekufakwa, noma lishoba letinwele tekufakelwa, noma leny'intfo noma lokunye kutakho... Loko kulunge ngalokuphelele, kodywa yekela tinwele takho tihlale titindze. Futsi wesilisa, hhula takho. Lonato, tigcine tihhuliwe. Uyabona na? Bese-ke, loko kuyakucatulula loko.

<sup>118</sup> Futsi wena wesifazane, wena gcoka njengewesifazane. Futsi wena wesilisa, wena gcoka njengewesilisa; ungatami kuba sitabane futsi ugcoke timphahla tebesifazane. Futsi besifazane, ningatami kuba bulisa futsi nigcoke timphahla tewesilisa, ngoba Nkulunkulu akafuni nikwente; liBhayibheli liyakulahlala loko.

<sup>119</sup> Kodvwa manje, mayelana nekufaka sigcokwana lesitinwele tekufakelwa noma kufaka tinwele . . . Yebo-ke, yini lenye yalawo “magundvwane”? Ngabe ngente liphutsa yini esikhashaneni lesendlulile noma ngabe lelo li “gundvwane”? Ku—kuyintfo—kuyintfo lo—lowesifazane layifaka etinweleni takhe kutenta tibukeke kakhulu . . . Noma ngabe kuyini (niyabona na?), akukho lokuliphutsa ngaloko. Chubeka, kulungile.

**409. Mnaketfu Branham, dzadze weta etabernakeli emamayela langemakhulu lasiphohlongo, futsi watsi bekakholwa kutsi wena unguJesu Khristu longene kumunfu. Ngicela ukhulume ngaloku. Impela beka (i-mp-a- . . .) bekete kubeketela ekutameni kutjela labanye lalakucabangako. (I-m-p-a-h-a- . . .) Ete kubeketela. Kulungile.**

<sup>120</sup> Manje, kusobala lodzadze bekaneliphutsa. Angisuye Jesu Khristu; ngiyinceku yaKhe. Sendlulile kuloko tikhatsi letinengi kakhulu. Kodvwa . . .

O, sengiyavala impela manje; ngikhulekeleni nje, kadze kancanyana nje.

**410. Mnaketfu Branham . . .** (Ningatsanza nje kuva leleminye yayo lesele nga—ngalokukhulu nje kushesha lengingakwenta na?) **Mnaketfu Branham, ngalesinye sikhatsi ngehluleka kuNkulunkulu wanginika i . . .** ngiva Nkulunkulu anginika setsembiso njengaSara nje. **Kwaba khona umbuto, kodvwa setsembiso sefika kamuva. Ngabe kwakusetsembiso saNkulunkulu na? Ngati kutsi saSara sasinjalo, kodvwa ngiva kungatsi sikhatsi sifishane kakhulu. Siyayitsanza inkonzo yakho naYe lowakubita (Loko kumnandzi, akumnandzi na?)—tsandza inkonzo yakho naYe lowakubitela kuyo, futsi ngako-ke, siyakutsanza.** O, basayine ligama labo. Ngiyabonga, dzadze nemnaketfu. Umbuto, ya, ya. Kulungile.

<sup>121</sup> Manje, Nkulunkulu . . . Cabanga kutsi Kunika setsembiso, futsi senteka njengaSara. Impela, nguNkulunkulu lofanako; Uphendvula ngendlela lefanako. Ungakholwa lutfo lolunye kodvwa kwakukwaNkulunkulu.

**Mnaketfu Branham, ngitsanza kukubuta leminye imibuto mayelana neliBhayibheli. Ngicela uchaze Makho loNgcwele . . .**

Nginawo lowo; nginawo lowo, Makho loNgcwele 16. Saba nawo lowo ngalololunye lusuku, ngiyakhumbula. Ake sibone.

**411. Mnaketfu Branham lotsandzekako, chaza Matewu loNgewe sahluko sema 22, livesi, ngesikhatsi... (Sinawo lowo. Niyabona na? Niyakhumbula ngalelinye lilanga? Ngito ngitokukhombisa wona. Ngangi... Niyawubona khona lapha, 22.) Sangena kanjani lesimenywa les esidlweni sakusihlwa seMshado, lesasifake ingubo, kodvwa singenayo lenye yengubo yemshado na?**

<sup>122</sup> Khumbulani, ngatsi... Ngatsi kuveta lihlaya lelincane; ngatsi, "Lomnaketfu welihlelo loweta nge—nge... loweta ngelifasitelo futsi hhayi ngeMnyango." UMnyango Livi.

**Watsi Khayini bekangewentalo yenyoka lenebucili. Washolani Eva kutsi, "Ngitfolile umuntfu eNkhosini"?**

Nguloko lebengitama kukutfola manje ekuseni. NginemiBhalo ibhalwe phansi lapha yalowo. Ngingahle ngitsi kwesekela kancane; ngitsemba kanjalo. Ngitfola leminye lapha...

**Mnaketfu Branham, umyeni wami, lowakhuliswa aliKhatolika, ekukhonteni kwetfu ufunu kukhuleka ngendlela lengeyakhe.**

Nginawo lowo. Niyakhumbula?

O, ngitfola lena khona ekhatsi lapha manje. Nginawo lowo.

**Mnaketfu Branham, ekugcineni ngi... kwenta dzadze abe nelisasasa de... Nginawo lowo. Dzadze lobekanadzadzewabo loliKhatolika.**

**Mnaketfu Branham, kuThimothi wesiBili 4, yini lesiphiwo lesaphiwa nge...?**

Nginawo lowo. Bangakhi loyikhumbulako na? Nginayo leminye ihlanganiswe lapha. Niyabona na?

**Kusemtsetfweni yini kitsi kutsi sisebentise noma nguluphi luhlob...?**

<sup>123</sup> Loko kuhlela umndeni. Ngi—ngi... Asengikhulume nawe nga—ngansense kuloko (uyabona?), njengoba ngishito manje ekuseni.

**Kucala, ngabe letintfombi letitiwula tasindziswa yini ngesikhatsi se...?**

Nginawo lowo. Ngiyasekela lapha. Umzuzu nje, ngibeketeleleni nje.

**Emvakwekuyati indlela, lokungenani indlela yekuphendvuka nekungcweliswa (Nginawo lowo, niyakhumbula?), bese-ke kuba kuwa kuloko...?**

Nginawo lowo futsi. Ngisekele ngandlelatsite. Ngitofanele nje ngiyitfole njenge...

**Mnaketfu Branham, usho kutsini Matewu loNgewe 24:28: “Nomaphi lapho kunenyama khona, kulapho la tinkhozi tiyobutsana khona”?**

Niyangikhumbula ngichaza loko na? Niyabona na? Nginawo lowo. Mhlawumbe sengicedzile ngayo. Ayibongwe iNkhosi!

**Sekusikhatsi—ngabe sekungiso yini sikhatsi sekutsi uMlobokati utodzingeka a—abe nawe entela** (Manje, niginawo lowo.) **IuHlwitfo na?**

Mhlawumbe ngi... Futsi ngiyati kutsi niginawo lowo, ngoba bewumakwe phansi ekugcineni; ngiyawukhumbula lowo. Yebo-ke, ayibongwe iNkhosi! Sehlela khona impela lapha manje. Ase sibone.

**412. Njengoba nje Tento 2:38 kunguyonandlela kuphela yekubhabhatiswa, kutsiwani ke ngalesicuku...? Nginawo lowo.**

<sup>124</sup> Abazange bawati ngetinsuku tabo; wembulwa manje nje. Emvakwekuba sewati kutsi ufanele wenteni, “Kulokwatikiko kwenta lokuhle futsi angakwenti, kusono kuye.”

**413. Mnaketfu Branham, kuliphutsa yini kuhlanyela—kuhlanyela futsi usebente eligwayini?** Angikhola kutsi niginawo lowo.

<sup>125</sup> Manje, ngiphambene neligwayi. Ngiphambene nekusetjentiswa kweligwayi; nomangumuphi umKhristu lotelwe kabusha angaphambana nako; kwaphela nje, ngoba alikalungi. Siyati kutsi ngisho nesayensi yetekwelapha itsi nguloko lokucala kakhulu umphimbo ne—nemdlavuza wemaphaphu, li—ligwayi. Batsi, “Bhema bosikilidi labanelihluto.”

<sup>126</sup> Manje, kini nine besilisa nebesifazane lenibhemako, loko nje kuyanikhohlisa, ngoba ningeke... Yebo-ke, intfo kuphela labayentako... Uma nitsenga bosikilidi labafakwe lihluto, nifanele nitsenge babe banengi, ngoba nje livumela liphesenti lelitsite lentfutfu lendlule. Ngoba nomangubani utoritjela kutsi...

<sup>127</sup> Ngasiva lesosifundvo lesifundvwako eMbukisweni weMhlabenhla eWashington ngemnyaka lophelile (ngesikhatsi ngingephandle lapho eMbukisweni weMhlaben), nalabodokotela labavela emhlabeni wonkhe lapho bakuchaza; batsi ungeke waba nentfutfu ngaphandle kwelitiyela, futsi ungeke... Futsi uma unentfutfu unelitiyela. Base batsi, “Ningayengwa ngumuntfu ngabosikilidi labanelihluto, ngoba lapho ubhema khona munye noma lomunye loko kungenelisa kulangatelela lonako kwasikilidi, uyobhema lomubili noma lomtsattu walolomunye.” Kuphela kuyi—yimvala mlomo yesive nje, imvala mlomo yekusakata emsakatweni namabonakudze.

<sup>128</sup> Kodvwa kusebenta ngeligwayi noma kuhlanyela ligwayi. Manje, nine bazalwane baseKentucky lenilima leligwayi... Yebo-ke, ake ngisho intfo yinye: Uma kunilahla kukwenta, ningakwenti, ngoba ngingeke ngitsandze kwenta intfo leto... lengatiko kutsi beyilekelela lomunye umuntfu kutsi aye ekufeni kwabo. Kuliphutsa kunika makhelwane sinatfo lesinemandla, khona-ke kungaba liphutsa kwenta sinatfo lesinemandla. Kodvwa ake ngisho lenye intfo manje. Manje, mayelana nekulihlanyela...

<sup>129</sup> Ligwayi, niyati, i-nikhoothini iyasetjentiswa futsi emagameni etemitsi yekwelapha. Futsi benati yini kutsi nihlanyela ummbila lowenta inkantini, kolo nebhali lokwenta inkantini na? Ngabe kunjalo na? Kulungile. Niyabona na? Anati kutsi batolisebentisela ini.

<sup>130</sup> Kodvwa manje, sihlanyela ummbila, lesingakucabanga uma sihlanyela ummbila, kutsi wente ema-khonfleksi, nekudla kwebantfu, sinkwa semmbila, nakanjalonjalo; kodvwa benta futsi netinatfo letidzakisanako ngawo (niyabona na?), ngako ungeke wati kutsi utokwentanjani.

<sup>131</sup> Futsi uhlanyela... Unengadze yemnduze. Niyati kutsi bentani ngemnduze? Benta i-ophiyamu ngawo. Niyati kutsi bentani nge-lethisi? Benta intfo lefanako. Ne-ophiyamu futsi iku-lethisi. Nike nasidla sikhehle se-lethisi bese ubona kutsi uva kunekuthula kanjani kancanyana na? Ngule ophiyamu lekuyo. Niyati futsi kutsi iku anyanisi? Impela. Ngako, ni-niyabona, kuya ngekutsi ukwentedela ini.

<sup>132</sup> Kodvwa ake ngisho loku, njengemnakenu longumKhristu kumnaketfu longumKhristu: Uma unesivandzi seligwayi, sitsengisele lomunye umuntfu, bese ulinga ummbila. Ngikholwa kutsi kungabancono (uyabona na?), ngoba akungabateki kutsi lalabakuhlanylakolu...

### **Umyeni wami washada nesidzakwa nesiphingi...**

Nginawo lowo. Uvela... Nginitjelile kutsi bewuvelaphi. Uvela khashane nalapha. Nginawo lowombuto. Futsi manje, ake sibone.

### **Lowesifazane waseSambulweni 12...**

Nginawo lowo. Ya, nginayo lencwatjana yemibuto. Ake sibone. Loko kunayo; nginayo. UseSambulweni 12, loko bekangiko. Ase sibone.

**414. Mnaketfu Branham, sinebantfwana lababili labaya esontfweni lelilawulwa ngumshumayeli wesifazane. Siyati kutsi wesifazane uphumile eVini. Bantfwana betfu bangaphansi kwalomtselela lonemandla. Singahamba kanjani sibatjele kutsi loku kuliphutsa na?**

<sup>133</sup> Nginitjelile ngaphambili. Ngiwuphendvulile lowo. Futsi nikuphetse ngebumnene. Beningatsini uma ngi... Ngiyati

lowomuntfu uhleti lapha. Nitsini uma ngikholwa kutsi ngiyati kutsi umuntfu ungubani futsi nginganitjela na?

**415. Ngabe kubusa kwesikhatsi seminyaka leyiNkhulungwane kuyoba yiminyaka leyinkhulungwane noma kubalwa kwesikhatsi nje?**

<sup>134</sup> Nginawo lowo ngisho namanje ekuseni. Niyabona na? Yiminyaka leyinkhulungwane. Kulungile.

**Mnaketfu Branham, inkinga yaloko loku...**

Ya, nginawo lowo. Kolo nelukhula, niyakhumbula sinawo lowo.

Ngikholwa kutsi siyehla ngco manje. Ngingahle ngiphonse incwatjana yalena emuva. Ake sibone. Intfo lefanako.

**Mnaketfu Branham, ngingumake webantfwana labasitfupha labasimangaliso nemyeni wami ufunu ngiyosebenta sikhashana kutsi ngisite kutetimali. Ngingasebenta yini? Futsi ngifuna kukhuleka kuNkulunkulu kutsi angiphe kukholwa loku... kutsi anginike... Abrahama na-na... kukholwa lokufanako...na-Abrahama naDanyela nebantfwana bemaHebheru. Ufanele yini umKhristu kutsi alime ligwayi na? Ngisanda kwendlula kuloko. Futsi...**

**416. Mnaketfu Branham, kuliphutsa yini kuwesifazane kutsi ahhule imilente yakhe na?**

<sup>135</sup> Ngabe ngibona tintfo yini? Ngabe loko akusho loko na? Angikwati...Angati. Ngitokushiyela wena loko.

**Ngabe—ngabe kulolusuku kuliphutsa yini kukalela sibalo semndeni wakho? Ngabe bekuchaza kuhlela umndeni ngalokuphelele na?**

<sup>136</sup> Ngiwuphendvulile lowo, kusobala, ku...umuntfu ngamunye. Ake sibone.

**Uma wesifazane asesesonweni atfole idivosi futsi aphindze ashade futsi...**

<sup>137</sup> Ngiwuphendvulile lowo. Niyakhumbula ngatsi, “Yekelani tindzaba temadivosi kuze...”

**417. Nginemngani lengimtsandza kakhulu. Bekanalamanye ematheyiphu netincwadzi lengikholwa kutsi tine... angikaze ngikhulume naye. Impela, ngiyacabanga ngyiesaba kumbhubhisa nekulahlekelwa nguye njengebungani. Ngifanele ngentenjani na?**

<sup>138</sup> Khuluma naye ngelutsandvo. Angi...Ngikholwa kutsi ngiuphendvulile lowo, kodvwa ngi—ngi...Unga—ungatami kufuca nomayini kunoma ngubani. Banini nebusawoti nje; bayokulangatelela kufana nawe.

Mnaketfu, dzadze, ngikholwa kutsi ngiyiphendvulile lena.

**Mnaketfu Branham, ngicela uchaze ngetintfombi letisihlanu letitiwula.**

Ngi—ngiyati nginawo lowo. Ubhaliwe, futsi liphepha lelibovu. Ngikholwa kutsi si... Nginawo lowo. Ngikholwa kutsi ngiyiphendvulile yonkhe leyalena. Ayibongwe iNkhosi. Ake sibone. Ngiyacolisa umzuzu nje.

**418. Mprofethi waNkulunkulu lotsandzekako, Makho loNgewe 16:18, Ngi...incenye yekubeka tandla etikwalabagulako...Ngingakubaphatsi betinyoka. Kutsiwani ngako?**

<sup>139</sup> Yebo-ke, lowo ngumbuto lomuhle. Uma ungakubaphatsi betinyoka, futsi batsi Makho 16... Impela! Ngikholwa kutsi liBhayibheli lichaza loko Lelikushoko. Ngikholwa kutsi uma sitama kulinga iNkhosi entfweni letsite, sikuyo. Kodvwa angicabangi kutsi Nkulunkulu uchaza wena kutsi unginike libhodlela le-asenikhi bese uyabona kutsi ngingawunatsa yini futsi ngifikazele kuwe kutsi nginekukholwa; akukho ngetulu kwekutsi ngikholwa kutsi kungabakuhle kuwe kungiletsela inyoka, bese ungenta ngiyitsatse, bese ngiyakukhombisa kutsi nginekukholwa kutsi ngingamncoba phoyizeni wayo. Angikholwa kutsi loko kunjalo.

<sup>140</sup> Ngiyakholwa kutsi kube bengisemantini ngibhabhatisa bantfu, noma ngenta emsebentini weNkhosi, noma ngephandle emahlatsini, bese inyoka iyangiluma, ngingahamba ngicondze ngco ngeliGama leNkhosi. Niyabona na? Ngikholwa kutsi nguloko lokukuchazako.

<sup>141</sup> Manje, uma nitotsatsa... Niyabona, lokwenta ngaloko, muntfu lotsandzekako nomangabe ungubani—kutsi ungubani... Kukhumbule loku. Niyabona na? Bukisia kutsi liBhayibheli latsini ngako. Akukho ngetulu kwekutsi ngikholwa kutsi uma utama kutsi, “Ludvumo, ludvumo, ludvumo...” Ungamlingi Nkulunkulu kutsi akhulume ngetilimi, vumela Moya nje akhulume ngawe. Uyabona na?

<sup>142</sup> Manje, angikholelw ekulingeni Nkulunkulu noma kufuca noma yini. Njengoba ngishito nje esikhashaneni lesendlulile, ngesikhatsi Moya... Silindzela kuMoya; Uywakwenta.

<sup>143</sup> Manje bukisisani, Pawula bekabutsa tinsaba eceleni kwasesichingini saseKhrethe, ngikholwa kutsi kwakungiso. Futsi bekaboshwe ngemaketane, nenyoka, mhlawumbe imamba... Loko kulumela kufa; bekangawa phansi masinyane impela, besafile. Angati ngalenye inyoka lengakubulala masinyane kangako, ngaphandle uma kubeyimamba.

<sup>144</sup> Futsi ngako wacupha lemamba, sitawusho njalo. Ilumela kubulala; unalokucishe nje, kuphefumula lokumbalwa nje lokusele. Uma imamba ikushaya, noma, imfeti, unelitfuba lelingemashumi lasihlanu lelilingene, ngemjovo wemahlungu enyoka, kutsi uphile, ngemfeti lemnyama. Ngemfeti lemtfubi

unemaphesenti langemashumi lasiphohlongo ekutsi ufe nemaphesenti langemashumi lamabili ekutsi uphile; ngemamba, awunaphesenti nje. Ufile nje, nguloko kuphela, ngoba awuphefumuli kuphela kuphefumula lokumbalwa nje. Ikhubata umgudvu wemizwa, umgudvu wengati, nako konkhe lokunye, futsi awusekho. Niyabona na?

<sup>145</sup> Kodvwa ngesikhatsi—ngesikhatsi lemamba leyayilume Pawula esandleni, batsi, “Yebo-ke, lowomuntfu ungu... Ungumuntfu lomubi, mhlawumbe umbulali. Ngisho naloku asindzile elwandle, kepha noko u...bekangeke asindze ekufeni. Bonkulunkulu utophindzisela kuye njengeteyakhe—ngekuba ngumbulali.”

<sup>146</sup> Pawula wabuka, nalenyoka ilenga esandleni sakhe, wavele nje wayivitsita yesuka, angakaphaphuleki nje nhlobo, “O, Nkhosi, ngisite kutsi ngikwente.” Cha! Wayibuka, wayinikinelu emlilweni, wachubeka nekubutsa tinsaba shengatsi kwakungakenteki lutfo nje.

Batsi, “Utokufa ngemzuzu nje, ngoba uma leyonyoka ikuluma, sewuhambile.” Emvakwesikhashana sikhatsi sendlula, Pawula akavuvukanga, afe, noma kwangabi nekutsintseka. Batsi...Bantjintja, batsi, “Ungunkulunkulu lowehle ngesimo semuntnfu.” Niyabona na?

<sup>147</sup> Akazange atsi, “Nginikeni leyonyoka,” kodvwa inyoka yamluma. Akazange amlinge Nkulunkulu, kodvwa bekanekukholwa kuNkulunkulu kwekuncoba kulunywa yinyoka. Niyabona kutsi ngisho kutsini na?

<sup>148</sup> Ngako nomangabe ungubani emkhatsini webaphatsi betinyoka, ngi... Manje, uma bafuna kuphatsa tinyoka, loko-loko kukubo. Niyabona na? Angikuboni nje ngaleyondlela.

<sup>149</sup> Manje, wena utsi, “Yebo-ke, labobantu banekukholwa.” Angisho kutsi bete kukholwa, batishisa ngethoshi lelikhanyisa ngegesi netintfo letinjalo, kodvwa (niyabona na?) nomakunjalo loko akufakazeli yena Nkulunkulu.

<sup>150</sup> Ngiwabonile emaNdiya atsatsa li—lilayini lemlilo, emafidi lamatsatfu kuvundla cishe nemayadi langemashumi lamane budze, uma uphuphutfwa ngemacembe uze ushise ubemhlophe (hhayi umuntfu lokhetsekile, balimi), akhumule ticatfulo tawo, atsatse lelincane (bapristi bawabusisa ngengati yetimbuti), futsi atsatse emahhuka lamancane langemahhuka ekudweba tinhlanti, bese awahloma esikhunjeni sawo ngetulu kwemlomo wawo, aze abe yinyakanyaka lenkhulu yinye ye-yemanti, agewaliswe kulokuncane lokusamabhola aKhisimus kanjalo, imihlobiso, agewaliswi, nalamakhulu emahhuka ekudweba tinhlanti lamadze kangaka ahlonywe enyameni yawo (ungatibonela kutsi kunjani kufaka nekukhipha), bese ema kanjalo, bese ayaphuma adzabule ngco emlilweni loshisako (futsi nje ku—nje lohsisa lokumhlophe, ngetulu le kulobovu,

kushisa lokumhlophe)—ahambe ehle ngco adzabula lowomlilo bese ujika ngco bese uyahamba ubuyela emuva, kungekho ngisho nesibati etinyaweni tawo. Futsi awakholelwa ngisho nakuNkulunkulu wetfu. Akhonta, kukhonta emadimoni. Niyabona na? Ngako loko akusho lutfo. Khwesha nje... Bani nje nguwangempela, lommandzi, umKhristu lotfobile, phila imphilo, khona-ke Nkulunkulu uyokunakekela konkhe lokusele kwakho.

- 419. Mnaketfu Branham, batoshumayela ngekutsini bashumayeli—batoshumayela ngekutsini labangangeni kuMlobokati na? Umlayeto wabo manje, Moya loNgcwele, umbhabhatiso wemanti, nensindziso, batoshumayela ngekutsini uma bangangeni kuMlobokati?**

<sup>151</sup> Yebo-ke, bato... Niyati kutsi mhlawumbe kutokwentekani? Ngisho loku, manje. Ngingeke ngakufakazela loku, kodvwa ngi... Bayovele nje bachubeke nekushumayela njengoba nje banako manje, nebantfu bachubeka bacabanga kutsi bayasindziswa; neMlobokati uyobe sekahambile.

- 420. Ngabe kulungile yini, ngekweLivi kuhlela umndeni?**

<sup>152</sup> Nginitjelile kutsi ngitokuphendvula ngansense loko. Wena lonalemibuto lena, wota kimi ngansense.

**Mnaketfu Branham lotsandzekako, sinathishela lomatiko wena kutsi umBhalo utsi...**

Ya, ngingawo lowo. Umzuzu nje manje.

**Mnaketfu Branham, ngalesinye sikhatsi sasineligama letfu libekwe encwadzini yalelitsite...**

Ya, ngingawo lowo. Umayelana nekutsi sebalisuse kanjani manje, ngabe benta liphutsa yini?

- 421. Yini...Ungakuvumela yini kuhlela umndeni?**

<sup>153</sup> Cha, ngingeke ngakuvumela. Cha, mnumzane. Niyabona na?

- 422. Ku...Ngabe lengelosi yesikhombisa, njengoba kukhulunywa ngayo, yeSambulo 10, ngumuntfu lofanako njenga-Eliya waMalakhi 4 yini?**

Ngabe ngiwuphendvulile lowo? Loko akuvakali kungatsi ngiwuphendvulile lowo.

<sup>154</sup> Yebo, ngumuntfu lofanako. Sambulo 10 nguMlayeto wengelosi yesikhombisa, lokukutsi... umlayeto wesitfunywa sesikhombisa semNyaka weliBandla weSikhombisa, lokunguMalakhi we 4.

**Ngabe kuhlela umndeni...**

<sup>155</sup> Nginencumbi kuloko. Ngivele ngayiphonsa emuva nje lena, futsi be—bengingafuni kuphendvula; kuncono ngikubone ngansense.

- 423. Sitfolaphi lapho Nowa ashumayela khona iminyaka lelikhulu nemashumi lamabili futsi wakha umkhumbi eminyakeni lelikhulu nemashumi lamabili?**

Ngabe ngiwuphendvulile lowo na?

<sup>156</sup> Situkulwane, noma sikhatsi lesabelwe, sikhatsi lesabelwe umuntfu emhlabeni sasiyiminyaka lelikhulu nemashumi lamabili, leyatsatsa Nowa, sikhatsi, kwakha umkhumbi, lokwakutsatfwa ngekutsi situkulwane ngalolosuku. Iminyaka lelikhulu nemashumi lamabili kwakusikhatsi lesabelwe umuntfu. Futsi washumayela, ngekwa...Genesisi 6:3, washumayela kulesositukulwane, lesasiyiminyaka lelikhulu nemashumi lamabili; Nowa wakwenta. Kulungile. Ake sibone manje.

- 424. KuMalakhi 4, lo-Eliya utotsatsa tinhlitiyo tababe tiye kubantfwana, bese-ke kuba tinhlitiyo tebantfwana kuboyise. Ngabe lona ngumuntfu lofanako na?**

<sup>157</sup> Yebo, ngumuntfu lofanako. Kulungile. O, awume kancane. Cha! Ngicolele, ngiyacolisa. Nje...Niyambona Moya loyiNgewe angibambela loko ke? Cha! Bengicabanga kutsi kutsite i...Niyabona na?

<sup>158</sup> Lokwakungiko kuMalakhi 3, lapho, "Ngiyatfuma sitfunywa saMi embikwebuso baMi," lokwakungu-Eliya. KuMalakhi 4 kujika kuyabuya kwase kutsi, "Bukan! Ngiyatfuma Eliya." Malakhi 3, Bekatotsatsa sitfunywa lesitfunywe embikwebuso beNkhosi Jesu, lokwakunguJohane. Bangakhi locondza loko? Malakhi 4, ngesikhatsi lo-Eliya efika, masinyane nje emvakweMlayeto wakhe netintfo, nasemuva, kuBuya kweNkhosi nekwentiwa busha kwemhlaba.

<sup>159</sup> Futsi niyacaphela, kukwenta kuciniseke manje kutsi akusyo i...Kutsi Moya loyiNgewe wakubhala kanjani ngalomprofethi, Watsi, "Uyophendvulela tinhlitiyo tabobabe, kucala, kubantfwana." Niyabona na? Loko kwakukufika kwaJohane kwekucala. Waphendvulela tinhlitiyo tabobabe, labadzala, bobabe lababokhoko, eMlayetweni webantfwana, lokwakusitukulwane lesisha ngalesosikhatsi, Jesu, kulesositukulwane. Bese-ke, sihlanganiso, kubopha ndzawonye "tinhlitiyo tebantfwana tibuye kubobabe," lokuchaza kutsi, uMlayeto wanamuha uyophendvulela tinhlitiyo tebantfwana emnyakeni welibandla tibuye kewukholweni kwePhentekhosti kwasekucaleni.

<sup>160</sup> Ngako kuyokuba nguletimbili letehlukene...Lesitfunywa sinye, kodvwa kwehlukanisa lapho ku-kufika kwekucala nekufika kwesibili, kwaJohane...noma sitfunywa, Eliya.

**Umyeni wami nendvodzana yami yekugcina ayikholwa...**

Ya, nginawo lowo. Ngiyati ngibe nawo, ngoba ngiyamati lomuntfu uneligama labo lisayinwe lapho. Ngiyakhumbula ngikhulumu nabo kamuva ngako.

**425. Singayitfolu kanjani intsandvo yeNkhosi? Likhaya letfu—letfu ku... Singalitfutsa likhaya letfu siye eJeffersonville, e-Indiana na? Umuntfu angaba yini ngumKhristu kepha angabatsandzi bantfu labangemakhalatsi? Ngabe Nkulunkulu akawafuni yini kutsi aphatfwe njengatsi, ngoba ansundvu ngelibala na? Unga...? Uncoma kutsini kuloku? Uyakholelwa yini ekungabandlululini noma ekubandlululaneni na?**

<sup>161</sup> Ngikholelwa ekungabandlululini. Ngikholwa kutsi umuntfu... Akunandzaba kutsi libala lakhe linjani noma ungebani, ungumuntfu njengami nje. Kunjalo impela. Futsi ngiyakholwa, kube nje bebatobayekela kanjalo labobantfu labangemakhalatsi, nalawomakhomanisi akaphumelanga lapho futsi abafake lugcozi...

<sup>162</sup> Manje, bebafun... Manje, bantfu labangemakhalatsi mbamba, kunesicuku mbamba lesitelwe kabusha, labangcwele labamesabako nkulunkulu kulabobantfu. Yebo, impela. Ngoba nje sikhumba sami simhlophe nesabo sinsundvu, loko akusho ngisho nayinye intfo kimi. Ungumnaketfu umaakuKhristu.

<sup>163</sup> Kungako ngehluka emlayetweni wesiBhunu; bebangakholwa ngisho nekutsi labobantfu banemphefumulo. Nguloko lokwangenta ngingatsandzi lapho. Ngatsi, "Lowomuntfu ungumuntfu ngalokufanako nje njengoba nginguy. Unemalungelo elungelwени lelifanako nalenginalo. Sikhumba sakhe asisho nalomncane umehluko kimi, noma kute namunye lomunye umuntfu lotelwe kabusha ngaMoya waNkulunkulu."

<sup>164</sup> Kodvwa ngatsi, "Uma bebangayekela labobantfu labangemakhalatsi kanjalo, bebaneke bafakwe lugcozi kanjena." Futsi ngitokusho kusuka kulelipulpiti... Sinetincumbi tebantfu labangemakhalatsi labeta lapha. (Angicabangi kutsi bakhona kusihlwa.) Kodvwa sinetincumbi tebantfu labangemakhalatsi labeta lapha kulelibandla. Mnaketfu, bemukeleke njengoba kwemukeleke ngunoma ngumuphi umuntfu. Bangumnaketfu nadzadze.

<sup>165</sup> Nalabanye bebantfu labanemoya lomuhle kunabo bonkhe lengake ngahlangana nabo emphilweni yami labanye bebantfu labangemakhalatsi. Khona-ke bakhona labanye labangemahlongandlebe, labafana nciamashi nebantfu labamhlophe, noma bantfu labamtfubi, noma bantfu labansundvu. Yebo, impela.

<sup>166</sup> Manje, angikholelwa ekucubaniseni imishado. Ngikholwa kutsi umlungu akafaneli kushada nentfombatane lelikhalatsi, noma intfombatane lelikhalatsi ishade nemlungu, noma

lomtfubi ashade nelikhataltsi, noma lomhlophe, noma i... Ngikhola kutsi lonsundvu, lomnyama, lomhlophe, netive tebantfu tinjengengadze yetimbali yaNkulunkulu, futsi angikhola kutsi tifanele tiphanjaniswe. Ngikhola kutsi nguleyondlela Nkulunkulu labenta baba ngiyo, futsi ngikhola kutsi nguleyondlela labafanele bahlale bangiyo.

<sup>167</sup> Ini...Kuyangilulata kutsi ngibone lenye intfombatane yelikhataltsi lenhle mbamba, lekhaphile, umntfwanyana lobukeka kahle, amuhle nje njenganoma ngumuphi wesifazane lobewungafuna kumbona...Kungani ifuna kushada nemlungu futsi babe nebantfwana labangemakula? Kungaba ngani intfombatane lelikhalatsi lekhaphile ifune intfo lenjengaleyo na? Kungenca yekutsi intfo letsite...kutsi likhomanisi... Futsi ingakwenta kanjani le-lenhle...i—i—indvodza lelikhalatsi ifune kushada nemlungu futsi babe nebantfwana labangemakula na?

<sup>168</sup> Angikhola kutsi ngi...Ngikhola kutsi nifanele nihlale nje njengoba sinjalo. Si—sitinceku taKhristu. NaNkulunkulu wangenta...Uma Angenta, libala lami limnyama, ngingajabula kuba yindvodza lemnyama yaNkulunkulu. Uma Angenta ngabamtfubi, ngingajabula kuba yindvodza lemtfubi yaKhristu. Uma Angenta ngabamhlophe, nging...?...umlungu lojabulile waKhristu. Uma Angenta ngabansundvu, noma ngababovu, liNdiya, nomangabe yini, ngiyohlala nginelibala lami lelifanako. Lowo bekuyoba ngimi. Ngifuna kuba njengoba uMenti wami angenta.

<sup>169</sup> Entasi lapho ngalolosuku eShreveport ngesikhatsi kufika loko kuvukelana, futsi labo...futsi kwakukhona onkhe lawomakhalatsi lamancane afakwe lugcozi ngephandle lapho, kwebukhomanisi...

<sup>170</sup> Nginitjelile lapha kulelipulpi, Martin Luther King usikweneti lesikhulu bantfu labangemakhalatsi labake baba naso. Kunjalo. Lowomuntfu utoholela tinkhulungwane tawo ekubulaweni (loko kunjalo), lefakwe lugcozi ngebukhomanisi.

<sup>171</sup> Ase ngifikazele liphuzu lami. Ngakusho loko cishe eminyakeni lemibili leyendlulile. Bukan kutsi kwentekani khona manje. Batsi bebalwela kungabandlululwa, futsi ngesikhatsi umtsetfo ubanika kungabandlululwa...Nakini nine bantfu leningakholelw ekuhlanganisweni, banini nemahloni ngani. Sive sakitsi siyakuvuma kungabandlululani, futsi sifanele sente loko latsi basi lomkhulu akwentiwe. Kunjalo impela.

Futsi manje, wena utsi...Hhayi kuta etindzaweni, nakanjalonjalo kanjalo, noma kutsenga, noma kuhlala kulingemuva lebhasi, nakanjalonjalo, cha, mnumzane! Umtsetfo utsi bayafana njengoba sinjalo nje natsi, ngako siyafana njengoba banjalo nabo; ngako asente ngaleyondlela. Asibe nguleyondlela. Futsi nguloko impela bonkhe bantfu labatelwe

kabusha beliciniso labakukholwako. Futsi manje, ngikholwa kutsi loko kusenhlitiyweni yabo.

<sup>172</sup> Angikaze ngibe neluvelo lolunjalo lwebantfu njengoba nginalabobantfu e-Africa, indlela lebebaphatfwa ngayo. Futsi angikholelwa kuleyontfo. Ngingumningizimu; ngatalelwa ngesheya kwemfula ngaleyela, kodywa nginjenga-Abraham Lincoln; ngita lapha, ngoba ngikholwa kutsi umuntfu batalwa ngekulingana. Kunjalo. Futsi angikholelwa ekwehlukaniseni bantfu netintfo letinjalo, ngesikhatsi labobantfu... babhabhatiswe ngaMoya loNgcwele nakanjalonjalo.

<sup>173</sup> Kodywa bukani, akusibo labobantfu labangemakhalatsi langemaKhristu latelwe kabusha labanga yonkhe lenkhatsato. Nifuna kubagceka ngaloko, nitsini ngalabanye bebantfwanyana betfu labangemambuka labamhlophe na? Niyabona na? Manje, lisobho lelihansi lilelicudze lelihansi. Ngani, bantfwanyana betfu labamhlophe babanga inkhatsato lephindvwe kabilis impela njengoba banayo. Loko kunjalo impela. Kukuphi na? Emakolishi akitsi netintfo letinjalo. Labanye bebantfu bakitsi labafundze kakhulu ubangela letotintfo. Niyabona na?

<sup>174</sup> Yebo-ke, kuyini na? Manje, kunikhombisa kutsi bukhomanisi futsi hhayi labobantfu labangemakhalatsi, bungene kanjalo-ke bukhomanisi kutsi bengamele. Benta loko kuto tonke tive. Bakwenta kanjalo-ke, banilwise emkhatsini walomunye nalomunye, umbhejazane, bese-ke bengamela ngaphandle kwekudubula. Abafuni kuchumisa lelive; bayalifuna. Bangalingena njengemswenya welukhula. Futsi manje, balubonile ludzaba lekwenta loko, futsi bayati kutsi kuvukela umbuso lokudzala kwakuyini, futsi bacabanga kutsi bebatocala lokunye kuvukela umbuso.

<sup>175</sup> Kufakazela kutsi liphuzu lami licacile, emvakwekuba sebanako kungabandlululani (banako manje, ngekwemtsetfo, ngalokusemtsetfweni), babanga lenengi inkhatsato kunanoma benta endzaweni yekucala. Niyabona na? Kukhombisa kutsi bukhomanisi futsi akusiyi leyomiphefumulo leligugu lotelwe nguMoya waNkulunkulu.

#### **426. Besingabe sisolo sivutsa futsi sishumayela liVangeli, noma ngabe sikhatsi sesendlulile na?**

<sup>176</sup> Cha, chubeka nekushumayela nje kamatima ngangoba ungakhona kushumayela. Mnaketfu, hlala nalo; ngisemvakwaho ngco.

#### **427. Mnaketfu Branham, ngesikhatsi uprofetha ngekutsi: awuyukudla emacandza, ungahlali esigodzini, ngabe lesosiprofetho sasisakho nje noma selibandla lonkhe? Kulungile.**

<sup>177</sup> Eminyakeni leyendlula, cishe eminyakeni lengemashumi lamatsatfu leyendlula, nganiketa siprofetho kutsi kuyofezeka kutsi getinsuku tekugcina kutsi kuyoba khona tifo emkhatsini

wetilwane, emkhatsini wetinkhomo, nemacandza, ngisho nasemacandzeni. Futsi kuyafezeka, kutsi kuyoba nemacandza langayulungela kudliwa. Futsi, kuyofezeka kutsi bantfu labahlala etigodzini... Manje khumbulani, ngaprofetha loko emuva le eminyakeni lengemashumi lamatsatfu leyendlula, kutsi kuyofezeka, kutsi bantfu labakhe etigodzini, kutsi ngiyocela emaKhristu atfutse etigodzini, nekutsi abayukudla... Tinyama letehlukene netintfo letinjalo, tiyoba nguphoyizeni. Kuyoba yingoti (Ngiyakhola ngalendlela lengaba nako ngayo) kutsi bantfu bahlale etigodzini.

<sup>178</sup> Manje, loko kwakungaphambi kwekutsi babe nekungavumelani noma bati nomayini ngekungavumelani. Kodvwa lowo kwakunguMoya loyiNgcwele angecwayisa. Futsi khona manje, ngisho nasetinkhomeni tetfu (nitibonile tisuka etimakethe) tifutfwa ngeDDT bahlele intfo letsite etinkhomeni.

<sup>179</sup> Caphelani futsi, tonkhe letintfo leti letibhasteliwe netintfo labatentako empeleni kubolisa sive lesibantfu. “Emaphesenti langemashumi lamatsatfu,” emaphesenti langemashumi lamabili noma emashumi lamatsatfu, kwasho iReader’s Digest, “etigulaneni esibhedlela sifakwa ekhatsi lapho ngenca yabodokotela.” Bayokunika umutsi wekushaya loku ukukhiphe kuwe, futsi kumisa lenye intfo letsite ngalapha.

<sup>180</sup> Futsi nike nawacaphela emacandza? Emnyakeni lophelile tigulane lettingemakhulu eLouisville naseJeffersonville tagula futsi salaliswa esibhedlela ngekuhlanta ngekudla emacandza enkhukhu esigodzini lapha... Emacandza lavela esigodzini abutsa lawa. Nelukhula lolunaphoyizeni, nalokunye nalokunye, yonkhe intfo yonakalisiwe.

<sup>181</sup> Kodvwa naku lapho ukutfola khona, mnaketfu. Ngikhola ngayo yonkhe inhlitiyo yami kutsi kubhaliwe emBhalweni kutsi—kutsi kute kudla lokufanele kwemukelwe ngaphandle kwekutsi kwemukelwe ngekubonga, ngoba kungcweliswa ngeLivi laNkulunkulu nemkhuleko. Niyabona na? Uma ukudla, tsani, “Nkhosi Jesu, Ungilungisele lokudla. Manje, ngekukholwa ngiyakungcwelisa lokudla loku ekuciniseni imitimba yetfu.” Bese uyakudla ke, ngoba kuko konkhe lesikwentako kungekukholwa.

### **Mnaketfu Branham lotsandzekako, tikhona yini tizatfu tedivosi kumyeni lodzakwako?**

<sup>182</sup> A—angitsandzi kukhuluma ngaleyodivosi. Loko—loko... Ku, ngi—ngi—ngitokhuluma ngaloko kamuvanyana.

**428. Mnaketfu Branham, Mnaketfu** (Umzuzu nje. Loku kucondzene nalomunye webafundisi lapha. Ake ngikufundze kucala. [UMnaketfu Branham uyema futsi utifundzela yena umbuto—Umhl.] Hum! Umzuzu nje. Yebo-ke, ngiyanitjela. Ngitowufundza nakanjani.)—**Mnaketfu Branham, uMnaketfu Neville wangitjela**

**ngesiprofetho kutsi ISHO KANJE INKHOSI kutsi ngangitokwemukela Moya loNgcwele. Angitjela ngalesiciniseko lesi kutsi ngangitokwemukela Moya loNgcwele, Angikamemukeli namanje Moya loNgcwele. Ngingachubeka yini...?**

<sup>183</sup> Yebo, impela! Yenta loko. Chubeka ukholwa.

Caphelani, ngibita...bengime kaMnaketfu Wood itolo ngesikhatsi kungena lucingo luvela endvodzeni lesesihlalweni lesinemasonvo, leta lapha inemtfwalo ngemzalwane noma lomunye umuntfu lobeka—lobekehlulwa tjwala futsi wendlula nakulabelapha labehlulwa Tjwala watsatsa nemijovo, esibhedlela, nakanjalonjalo; neMnaketfu Neville, kukhuluma ngetilimi noma ngandlelatsite waniketa sisiprofetho etikwalomuntfu, futsi waniketa siprofetho kutsi kwakutokwenteka intfo letsite kuleyondvodza kube ngolokuhle emkhatsini wetinsuku letimbalwa letilandzelako, noma intfo lefana naleyo. Nalendvodza yashaya lucingo yase itsi lendvodza, sekutinsuku lettingemashumi lasitfupha nesiphohlongo manje, sekube ngito esibhedlela, ayikanatsi ngisho nabunye, noma idle ngisho sinye sidzakamizwa kuvimbela kunatsa, nomayini. Nentfo uMnaketfu Neville layisho esiprofethweni yafezeka. Ayibongwe iNkholwa kutsi uMnaketfu uyindvodza yaNkulunkulu.

#### **Mnaketfu Branham lotsandzekako, ngabe labo...?**

<sup>184</sup> Manje ake nilindze, ake ngime lapho umzuzu nje. Manje, nguloko lengitama kukutjela bantfu. UMnaketfu Neville ukholwa nguMlayeto lofanako lengiwukholwako. UMnaketfu Capps, uMnaketfu Beeler, uMnaketfu Ruddell, bonkhe labanaketfu khona lapha bakholwa loMlayeto lofanako lengiwukholwako; bayawushumayela, ngalokufanako njengoba ngenta.

<sup>185</sup> Futsi uma ufuno, ufuno impela, utophuma, futsi utotsatsa umhlalaphansi noma lokutsite noma lokunye, futsi ufuno kutela Livi, wota lapha. Wota etabernakeli, ngulapho uWuva khona.

<sup>186</sup> Lawa yindvodza lemesabako nkulunkulu. Ayindvodza leneMoya loyiNgcwele lofanako lenginawo na—nalonawo, sifundzisa eBhayibhelini lelfanako neMlayeto lofanako.

#### **Mnaketfu Branham lotsandzekako, ngabe labo labayokhuluma ngetilimi yinsali...?**

Ya, nginawo lowo. Uh, huh, nginawo lowo, etikwekukhuluma ngetilimi.

**Mnaketfu Branham, inshumayelo yakho ngembhabhatiso waMoya loNgcwele, ngabe ngumbhabhatiso eGameni laJesu...?**

Ya, nginawo lowo. Ake sibone.

- 429. Mnaketfu Branham, liBhayibheli lisitjela kutsi u—umfati ufanele atfobele umyeni wakhe. NgingumKhristu nemyeni wami usoni. Ungihlupha ngato tonkhe tindlela langatenta, nekutsi mine ngingayi enkonzweni, nekufundza liBhayibheli lami, futsi—futsi uphika Livi. Ngifanele ngentenjani?**

<sup>187</sup> Ufanele wentenjani? Manje, lalela, ufanele utfobele umyeni wakho; lelo Livi. Manje, uma akutjela futsi ala kutsi ufundze liBhayibheli, kutsi uye enkonzweni, noma intfo lenjengaley, awudzingi kutsi ukutfobele loko, ngoba, “Loyo lo—longeke ashiye uyiise, unina, umyeni, umfati, noma ngabe kuyini futsi aNgilandzele, akaNgifaneli.” Ngabe loko kunjalo na?

<sup>188</sup> Cha, ungakwenti...Emadvodza afanele...awukafaneli... Indvodza ayikafaneli kusebentisa lelogunya etikwewesifazane ngenca yekutsi nje ingumbusi wakhe. Nkulunkulu ungumbusi wakhe ngeulu kwakho, mnaketfu. Niyabona na? Futsi uma umkakho enta intfo leliputsa, khona-ke ninga...khonake unelilungelo lekumtjela, futsi ufanele akulalele. Kodvwa awunalungelo lekumshaya, noma uhambe umhudvula, noma—noma wente letotintfo. Cha! U...

<sup>189</sup> Nkulunkulu wentela indvodza umsiti, hhayi limethi lasemnyango. Khumbula, lowesifazane u...Bekasithandwa sakho; ufanele ahlale njalo anguloko.

- 430. Kunini futsi kukuphi lapho bantfu baNkulunkulu bayobutsanela khona Livi lekugcina na?**

<sup>190</sup> KuKhristu. Yebo! Kwelusuku lwekugcina, bayobutsana kuKhristu. Ningakukhohlwa loko manje. Sinendzawo yekubutsana; sinayo impela nje.

- 431. Sibitwa nge...(Manje, nankhu lombuto wangalelelinye lilanga.) Sibitwa ngetinyoni lettingcolile, ngoba siya ebandleni laJunior Jackson. Ngaletinye tikhatsi ngoba sikany ne—ne...Akavumi kwenta imigomo yelibandla lemisha lapha ebandleni. Ngabe singaphandle yini kwentsandvo yaNkulunkulu lephelele kwetsamela lapho ngagletinye tikhatsi na?**

<sup>191</sup> Cha, mnumzane! Ngikholwa kutsi Junior Jackson uyindvodza yaNkulunkulu. Sengivele ngikuchazile. Ngiyakhholwa...

<sup>192</sup> Manje, asivumelani etikwenchubo yelibandla. Manje, ngikholwa kutsi laJunior—Junior...Kungani a...Bangakhi lowati Junior Jackson? Ngani, siyati leyondvodza iyindvodza lemesabako nkulunkulu. Iyawukholwa loMlayeto ngalokufanako nje njengoba ngenta, futsi iyatikholwa letintfo leti. Ecinisweni, Junior nami sibobhuti nje, njengoba nje onkhe lawa lamanye indvodza anjalo lapha, J. T., ne—neMnaketfu Ruddell, neMnaketfu Jackson, neMnaketfu Beeler, nabobonkhe balabanaketfu lapha; sonkhe, sindzawonye. Manje,

asi... singahle nje singaboni ngasoliniye (niyabona?), kodvwa sikhola loMlayeto lofanako (niyabona?), futsi siyanamatselana ndzawonye. Nanguya uMnaketfu Humes ngalapho naye, sitfunywa senkholo, futsi o, labanengi kakhulu labehlukene, ngi... Ngaletinye tikhatsi angitfoli ngisho nekutsi ngibabite ngemagama abo, kodvwa ni—niyati kutsi ngicondze nine empeleni, mnaketfu. Impela.

### Bewungatsandza yini kukhwesha ekwenteni bunesi...

<sup>193</sup> Ngikubutile loko. Niyakhumbula na? Ngudzadze lonemoya lomuhle lotsandzekako lobekafuna kwati ngekwenta bunesi.

**Ngesikhatsi ngisemncane, bengi...ngatjela wonkhe umunfu kutsi ngangifuna kuba ngumshumayeli.** (Nginawo lowo. Nginawo lowo futsi.) **Khona-ke ufanele entenjani nganamuyla na?**

<sup>194</sup> Yebo-ke, lena yincwadzi levela e—esisebentini lesingumfundisi waKhristu, loko akusiko... Yincwadzi lecondzene nami. Ivela kuMnaketfu Pat Tyler, lomunye webanaketfu lapha ebandleni.

Nguleyo yonkhe. Ayibongwe iNkhosi. Ngryanibonga bantfu. Ngitfola nje i...[Akucoshwanga etheyiphini—Umhl.]

...bamunye,

Tindvudvuto tetfu nekukhatsalela kwetfu.

<sup>195</sup> Angati noma Dzadze Wilson usekhona yini lakulesakhiwo? Ngimbone lapha. Uyati kutsi bengentani esikhashaneni lesendlulile, Dzadze Wilson? Bengibuka titfombe ngesikhatsi sibeka litje lekusimisa likona. Ngibuke sitfombe ngase ngibona Hope nami sisengakashadi. Beringati ngisho nekutsi... Ngiyakhumbula ngibona sitfombe ngesikhatsi ngiphuma kulenye yetimphi tami, ngesikhatsi ngizuza bumpetha. Ngibuke sitfombe sami ngalolobunye busuku ngisengugadzi wetinyamatane wahulumeni lapha e-Indiana. Futsi ngicabanga ngelibandla. Uyati, ngiyacabanga akekho ngaphandle kwemunfu munye lohleti lapha kusihlwa kulelocembu losasele. Bangakhi lolapha kusukela esikhatsini lessabeka ngaso litje lelikona emuva lapho ekucaleni? Phakamisa sandla sakho.

<sup>196</sup> Mnaketfu, Dzadze Wilson, ngifuna ku—kunibuta intfo lokubili. Niyakhumbula kutsi sonkhe sacala kanjani? Uyasikhumbula siyilo lesidzala ngesikhatsi sonkhe sigewe ludzaka na? Lalinemafasitelo lamadzala latamatamako. Besinemasenti langemashumi lasiphohlongo kulicala. Lenkhulu incumbi yelukhula, konkhe loku kwakufana nelihlatsi njengasemvakwetfu lapha ngesikhatsi silakha, lelitabernakeli.

<sup>197</sup> Sibuke sonkhe lesatsatsa tifungo tetfu futsi samasha situngeleta i-altari. Sibabonile befi ka bahamba, lomunye kulomunye. Nibacaphelile labo labahlala neMlayeto, kutsi

bahamba kanjani na? Manje, cabangani ngalabo labasukako eMlayetweni, kutsi bahamba kanjani. Kucabangeni nje.

<sup>198</sup> Manje silapha kusihlwa, emvakwalo lonkhe lelocembu lelikatsatfu kulelesinalo lapha manje emihlanganweni yetfu legcwele kakhulu. Kucabangeni, ngesikhatsi emabhasi etikolwa bekapakwa eveni lonkhe ngco lapha kusukela ndzawo tonkhe nemacentselo, kwenyuke futsi kwehle kulesabelo. Ngisho nekucicima ekumisweni kwemathende ngephandle ekhatsi lapho kukunakekela, ngisho nomakunjalo wawungeke uhlalise bantfu ndzawo, kubutsana ndzawonye. Ngangise ngumshumayeli longumfana nje. Niyabona na? Futsi kuletotinkhulungwane lesasinato, kunalabatsatfu betfu labasele ekhatsi lapha kusihlwa.

<sup>199</sup> Ngiyakhumbula Dzadze Wilson lapho ngesikhatsi ngibitelwa eceleni kwembhedze wakhe abulawa yi TB, opha, aze emashidi nekwekushutheka umcameloo kwakubekiwe, kushone ingati, ekoneni. Ngiyakhumbula Moya loyiNgcwele ancamlua ingati. Tinsuku letimbalwa kamuva ngambhabhatisa eMfuleni i-Ohio emantini lanelichwa eGameni laJesu Khristu, ngase ngimhhalisa ngemuva kwemoto yami levulekile, imoto lendzadlana lelingene bantfu lababili, ngase ngiyamhambisa esuka e-Utica... Kwakungenjalo na? Esuka... [Dzadze Wilson ukhuluma neMnaketfu Branham-Umhl.] Ya! Dzadze Hope, umkami, dzadze lapho, bekasesitulwени lesingembili salemoto lencane lelingene bantfu lababili, namake wami naDzadze Snelling lengemuva. Nginasositfombe sabo, Dzadze Snelling, Make, nabo bonkhe, Nkkt. Weber, Nkkt... maketala wami, sonkhe entasi lapho, naMeda, intfombatanyana lencane nje eme ngephandle lapho, futsi manje, sewunguwesifazane losanenhloko lemphunga. [Lomunye dzadze ukhuluma neMnaketfu Branham]

<sup>200</sup> Ngiyakhumbula ngesikhatsi banlusuku loluncane lwesigcebhezane kutsi sitfole imali yetfu yekucala. Futsi ngiyakhumbula Hope eme ekoneni. Bekaseyintfombatane nje, cishe lishumi nesittupha; bekatsengisa kanjena, avete lesigcebhezane. Abanika sigcebhezane. Bekasifaka ekhatsi...

Kwefika sidzakwa entasi nemgwaco; satsi, "Ngiyacolisa, Nkhosatana!" Satsi, "Utsengisani?"

Watsi, "Kute. Ngako ngikunika lesigcebhezane." Watsi, "Ngumnikelo wendlu yekukhontela. Uma ufunu kufaka noma yini lapha yemnikelo, sitama kutfola imali leyenele kutsi sakhe litabernakeli leku... ladolobheni." Watsi, "Uma ufunu kufaka nomayini, ungakwenta, kodvwa uma..."

Satsi, "Anginalutfo mine."

Watsi, "Sitsatse lesigcebhezane nomakunjalo." Wasitsatsa wase uyasibuka. Ngakulolunye luhlangotsi kwakutsi—kwakutsi—kwakutsi, "Uyolicitselaphi liPhakadze?"

Nangakulolunye luhlangotsi kwakuneluphawu lwembuto.  
“Uyolicitselaphi liPhakadze?” Umbuto.

Wadzayitela abuyela emuva, wayibuka; watsi, “Nkhosatana, ubuta umbuto lomatima!”

Watsi, “Kodvwa ufanele ucatululwe!” Loko kunjalo. Sewahamba waya ngesheya kwelikhethini kusihlwa. Ngiyawakhumbula emavi ekugcina lawasho. Ngiyakhumbula kutsi ngamtjelani; ngiyakukhumbula. Yebo, mnumzane!

<sup>201</sup> Incumbi yemanti yehlele emfuleni. Sasivamise kuma entansi... Futsi ngaphambi kwekutsi size sibe ngisho nendlu yekukhontela, sasivamise kuma futsi sibambe tandla bese sihlabela leliculo lapha. Sengiyaliva nje. Myrtle bekasengumntfwanyana nje ngalesosikhatsi. Nginesitfombe saLeroy lomncane eme ngephandle lapho, umntfwanyanyana nje cishe lonjalo.

Libusisiwe lifindvo lelibophako  
Tinhliityo tetfu elutsandvweni lwebuKhristu;  
Inhlanganyelo yemcondvo webuhlobo  
Injengaloko lokungetulu.

<sup>202</sup> Uma sihlabela lelo kunalabanengi babo labalindze ngaleyia balindzele kufika kwaKhe.

... sehlukana incenye,  
Kusinika buhlungu bangekhatsi;  
(Niyatsandzana kanjalo na?)  
Kodvwa siyosolo sihlangene enhlitiywani,  
Futsi setsemba kuphindze sibonane futsi.

<sup>203</sup> Mnaketfu Fleeman, sewusondzele kuya lapho, awunjalo na? Bengicabanga nje, ngakwati ngesikhatsi siya kaMnaketfu Roy. Uyabakhumbula baka-Adcocks? NginaKenneth. Kwakungubani ligama ladzadzewabo? [UMnaketfu Fleeman ukhulumna neMnaketfu Branham—Umhl.] Nginaso sitfombe sabo; sonkhe sasime ngephandle lapho nemikhono yetfu sigacene, situngelete ngaphambi kwendzawo, Dkt. Roy E. Davis, umfundisi. Bengibabuka esikhashaneni lesendlulile. Doc ute netifombe letindzala. Kutsite nje kungenta ngitivele ngicakile mbamba phansi lapha. Manje loko... labanengi babo sebashona (niyabona na?)—sebashona. Akunawuba kadze kuze kube ngitsi lesitoshona. Niyabona na? Kodvwa...

Kodvwa uma sehlukana incenye,  
Kusinika buhlungu bangekhatsi;  
Kodvwa siyosolo sihlangene enhlitiywani,  
Futsi setsemba kuphindze sibonane futsi.

<sup>204</sup> Niyamkhumbula uMnaketfu Bosworth? Ngaphambi nje kwekwewela kwakhe, wasukuma ekamelwени, wahamba lapho esiyilweni, wase uchawula uyise, namake, nalebebaphendvukile bakhe kuKhristu. Iminyaka lengemashumi lamane, kwase

kuyiminyaka lengemashumi lamane noma emashumi lasihlanu bafa. Ubabone beme lapho ekamelweni, atama kutsi wonkhe umuntfu ababone. Kwakuyini na? Lendvodza lendzala yase yendlulela kulelolive lapho bengikhona khona embonweni ngaloko kusa. Kunjalo.

<sup>205</sup> Ngibabonile khona lapho; besebabasha futsi. Sisasolo sichumene enhlitiyweni; siyetsema kuphindze sibonane futsi. Kunjalo. Nkulunkulu anibusise.

<sup>206</sup> Kwentekile ngabuka emuva kulesakhiwo, ngikhuluma ngebangani bami labangemakhalatsi, futsi ngibona uMnaketfu naDzadze Nash bahleti emuva lapho. Beningati kutsi benikhona lapho. Kwentekile nje kutsi ngibuke emuva; basemuva le. Nalona lomunye umnaketfu lohleti lapha... Ngabe lowo nguloMnaketfu longinika loko kumemeta lokukhulukati emuva lapho kanye ngesikhatsi, lolohleti ngalapha? Angisalikhumbuli ligama lakhe. UMnaketfu Wood utsite bekakhuluma naye. Watsi, "Uyati? Uma uMoya atseleka kimi, ngiyampompolota 'Heyi!'" Watsi, "Ngiyetsema kutsi angiphathamisi lutfo." Uma ungampompoloti "Heyi!" kuyangiphathamisa. Nkulunkulu akubusise. Ngiyakutsandza mnaketfu, dzadze. Kunjalo.

<sup>207</sup> Mnaketfu Nash, Dzadze Nash, niyati ngiyanitsandza. Yebo, mnumzane! Ningumnaketfu nadzadze kuKhristu Jesu.

<sup>208</sup> Bangani labanemoya lomnandzi labatsandzekako, nanoma ngumuphi lomunye, uma ngigeje labanye babo, leyominyango ivulelwe nine lapha. Iminyango yaseZulwini iyovuleka nayo.

Kodvwa siyosolo sihlangene enhlitiyweni,  
Futsi setsema kuphindze sibonane futsi.

Lwami...

*Lukholo Lwami Lubuka Etulu kuWe*, manje, njengoba sisahlabela. Asilhlabele kanye futsi manje. Sesikhatsi sekuya ekhaya manje.

Lukholo lwami lubuka etulu kuWe,  
Wena Wundlu laseKhalvari,  
O Msindzisi webuNkulunkulu!  
Manje ngive ngisakhuleka,  
Susa tonkhe tono tami,  
O akutsi mine kusukela kulolusuku  
Ngibe waKho ngalokupuhele!

Asitame loyo *Ngcwele*, *Ngcwele* futsi, nitometama na? Sinike ishuni, Dzadze. "O..." Uyalati? Uyakhumbula ngesikhatsi Dzadze Gertie kanye nabo bavamise kulihlabela?

<sup>209</sup> Lusuku lufela enshonalanga, emaZulu abusisa umhlabu; umhlabu uyabusiswa. Ngikutsandza kanjani pho kushona kwelilanga lakuSIhlwa, liyoshona, tinyoni setenta kumemeta kwato kwekugcina. Loko kutofika kuwo wonkhe wetfu

ngalesosikhatsi. Ngicabanga kutsi sikhatsi sakusihlwa... Nicaphelile yini? Umoya uyoekela kuhhusha; tinyoni tiyothula. Niyabona na? Live lelifako, lusuku luyafa kutsi lumphindze lutalwe kusasa ekuseni. Kulungile, ake silitame manje uma singakhona:

Ngcwele, Ngcwele, Ngcwele, Nkhosi  
Nkulunkulu loneMandla Kakhulu.

Lee, yenyukela lapha umzuzu. Ngi—ngi—ngikholwa kutsi ngi—angicabangi kutsi ngiyalati ngaleyondlela. Ase ngilitame ngaphandle kwetinsimbi. Niyabona na? Ase sibone kutsi singalitfolo yini. Manje, ngiyati... Ngingahle ngilisho kabi. Niyabona na? Ngisiteni manje, wonkhe wenu, manje.

Ngcwele, Ngcwele, Ngcwele, Nkhosi  
Nkulunkulu Kakhulu... emabandla.

LiZulu nemhlaba kugcwele Wena,  
LiZulu nemhlaba kudvumisa Wena,  
O Nkhosi lePhakeme Kakhulu!

Niyakutsandza loko? Loko akwenti yini lokutsite kini? Asilitame futsi:

Ngcwele, Ngcwele, Ngcwele, Nkhosi  
Nkulunkulu lePhakeme Kakhulu!  
LiZulu nemhlaba kugcwele Wena,  
Lizulu nemhlaba kudvumisa Wena,  
O Nkhosi lePhakeme Kakhulu!

<sup>210</sup> Ngiyakutsandza loko, anikutsandzi yini nine? O, ngiyawatsandza nje lawomaculo lamnandzi lamadzala. Kunalokutsite ngalawomaculo lengikutsandzako. Ningaba nawo onkhe emaculo enu lamancane ancanyuliwe lenifuna kuba nawo. Nginikeni lelo; ngiyalitsandza lelo. *Yendlula iVeyili leDzatjuliwe*, onkhe lawa lamanye emaculo lamahle njengalelo; ngiyawatsandza lawomaculo. Ngicabanga kutsi kuhlabela kuyincenye yekukhonta (yebo, mnumzane!), kuhlabela tindvumiso teNkhosi.

<sup>211</sup> Kulungile, kwengoma yekusikhisha, manje, ingoma, itsi *Hamba neliGama laJesu*. Kwangatsi iNkhosi inganibusisa manje sisasukuma.

Hamba neliGama laJesu,  
Mntfwana welusizi newamaye;  
Liyokunika injabulo nendvudvuto,  
O, Litsatse noma uyaphi.

Gama leliligugu, O limnandzi kangaka!  
Tsembo lemhlaba nekwetsaba kweliZulu;  
Gama leliligugu, O limnandzi kangaka!  
Tsembo lemhlaba nekwetsaba kweliZulu.

Manje nali livesi lengilitsandzako, futsi lisecwayiso kini nonkhe manje. Yenta ini?

Hamba neliGama laJesu,  
 NjengeLihawu kubo bonkhe bosochaka;  
 (Lalelani!)

Uma tilingo tikutungeleta, (Ufanele wenteni?)  
 Vele nje uphefumule leloGama leliNgcwele  
 ngemkhuleko.

Gama leliligugu, O limnandzi kangaka!  
 Tsembo lemhlaba nekwetsaba kweliZulu;  
 Gama leliligugu, O limnandzi kangaka!  
 Tsembo lemhlaba nekwetsaba kweliZulu.

Asikhotsamise tinhloko tetfu manje.

Site sibonane! site sibonane!  
 Site sibonane etinyaweni taJesu; (Site  
 sibonane!)  
 Site sibonane!

[Lomunye utsi, “Ungangikhumbula emkhulekweni?”—Umhl.]

Nkhosi Jesu, busisa umnaketfu lotsandzekako, futsi  
 umphilise manje eGameni laJesu. Siphe kona, Nkhosi.



*IMIBUTO NE TIMPHENDVULO SSW64-0830E*

(Questions and Answers)

TINSHUMAYELO NGEKUTIPHATSJA, INCHUBO NE MFUNDZISO YELIBANDLA

LoMlayeto ngeMnaketfu William Marrion Branham, kwekucala wetfulwa ngesiNgisi ngeliSontfo kusihlwa, ngenyanga yeNgci 30, 1964, eTabernakeli laBranham eJeffersonville, eIndiana, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Luku kuhunyushwa ngeSiSwati kwakhicitwa kwakhishwa yiVoice Of God Recordings.

SWATI

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)